

清

史

稿

高宗本紀一

高宗法天隆運至誠先覺體元立極敷文奮武欽明孝慈神聖純皇帝諱弘曆世宗第四子母孝聖憲皇后康熙五十年八月十三日生於雍親王府邸隆準願身聖祖見而鍾愛令讀書宮中受學於庶吉士福敏過目成誦復學射於貝勒允禧學火器於莊親王允祿木蘭從獵命侍衛引射熊甫上馬熊突起上控轡自若聖祖御鎗殪熊入武帳顧語溫惠皇太妃曰是命貴重福將過予雍正元年八月世宗御乾清宮密書上名緘藏世祖所書正大光明扁額上五年娶孝賢皇后富察氏十一年封和碩寶親王時準噶爾役未竟又有黔苗兵事命上綜理軍機諸決大計十三年八月丁亥世宗不豫時駐蹕圓明園上與和親王弘晝朝夕謹侍戊子世宗疾大漸召莊親王允祿果親王允禮大學士鄂爾泰張廷玉領侍衛內大臣豐盛額訥親內大臣戶部侍郎海望入受顧命己丑崩王大臣請奉大行皇帝還宮莊親王允祿等啓雍正元年立皇太子密封宣

詔卽皇帝位尋諭奉大行皇帝遺命莊親王允祿果親王允禮鄂爾泰張廷玉
輔政並令鄂爾泰復任以鄂爾泰因病請假也以遺命尊奉妃母爲皇太后復
奉懿旨以上元妃爲皇后召大學士朱軾回京命大學士嵇曾筠總理浙江海
塘工趙宏恩署江南河道總督大行皇帝大殮命以乾清宮南廡爲倚廬庚寅
命總理事務王大臣議行三年喪命履郡王允禩暫管禮部事務召張照回京
以張廣泗總理苗疆事務大學士邁柱署湖廣總督諭大將軍查郎阿駐肅州
與劉於義同掌軍務北路大將軍平郡王福彭堅守飭揚威將軍哈元生等勦
撫苗疆癸巳頒大行皇帝遺詔九月丁酉朔日食高起憲德俱能仍帶尙書銜
以鄂爾泰總理兵部事果親王允禮總理刑部事莊親王允祿總理工部事甘
汝來爲漢兵部尙書傅鼎署滿兵部尙書己亥上即位於太和殿以明年爲乾
隆元年庚子定三年喪制却羣臣以日易月之請命大學士朱軾協同總理事
務王大臣辦事辛酉召史貽直來京壬寅止進獻方物禁內廷行走僧人招搖
頒乾隆元年時憲書鑄乾隆通寶遣官頒詔朝鮮內辰賑甘肅蘭州平涼等處

旱災丙午命慶復往北路軍營代回福彭手勅額駙策凌勿離軍營丁未大行
皇帝梓宮安奉雍和宮戊申上詣雍和宮行禮自是日至乙卯以爲常己酉賞
莊親王允祿果親王允禮雙俸鄂爾泰張廷玉世襲一等輕車都尉朱軾世襲
騎都尉庚戌召楊名時來京辛亥命海望署戶部尙書傅鼎署刑部尙書乙卯
上詣雍和宮行大祭禮奉皇太后居永仁宮是日上移居養心殿命廷臣輪班
條奏各舉所知戊午賞李紱侍郎銜命管戶部三庫事己未上詣雍和宮梓宮
前行月祭禮自是迄奉移每月如之再免民欠丁賦並諭官吏侵蝕者亦免之
逮傅爾丹下獄庚申開鄉會試恩科免貴州被擾州縣之額賦未擾者停征辛
酉上詣田村孝敬皇后梓宮前致祭以本年鄉試弊多逮治考官顧祖鎮戴瀚
大學士馬齊乞休允之癸亥召署河東鹽政孫家淦來京以侍郎用冬十月丙
寅朔饗太廟遣裕親王廣保代行命副將軍常德赴北路軍營丁卯申禁各省
貢獻以張廣泗爲征苗經略揚威將軍哈元生副將軍董芳以下俱聽節制庚
午命履郡王允禩管禮部召原任尙書涂天相來京辛未以任蘭枝爲禮部尙

書壬申免江南等省漕糧蘆課及學租雜稅命治曾靜張熙罪加左都御史福敏太子太保以王大臣辦事遲延疏縱申諭嚴明振作毋與用寬之意相左調徐本爲刑部尙書涂天相爲工部尙書丙子以劉勸爲直隸河道總督丁丑起彭維新爲左都御史命徐本軍機處行走癸未停諸王兼管部院事甲申授海望戶部尙書己丑命來保署工部尙書兼管內務府癸巳傅爾丹岳鍾琪石雲倬馬蘭泰論斬申午改訥親海望徐本爲協辦總理事務納延泰行走如班第等例豐盛額莽鵠立罷庚子張照下獄鞠治壬寅湖北忠崗等十五土司改土歸流分置一府五縣於恩施縣建府治名曰施南府分設縣治名曰宣恩來鳳咸豐利川乙巳申諭薦舉博學鴻詞丁未上大行皇帝尊諡曰敬天昌運建中表正文武英明寬仁信毅大孝至誠憲皇帝廟號世宗次日頒詔覃恩有差免四川巴縣等旱災額賦戊申召邁柱來京以史貽直署湖廣總督庚戌以孫家淦爲左都御史癸丑命慶復爲定邊大將軍赴北路軍營命孫家淦仍兼管吏部諭赦降苗罪免貴州三年內耗羨內辰上詣田村上孝敬憲皇后尊諡曰孝

敬恭和懿順昭惠佑天翊聖憲皇后次日頒詔覃恩有差改河東總督仍爲河南巡撫以傅德爲之丁巳授鍾保湖南巡撫俞兆岳江西巡撫命岱林布爲右衛將軍己未以平郡王福彭協辦總理事務董芳元展成德希壽視職逮間奪哈元生揚威將軍命經略張廣泗兼貴州巡撫癸亥賞阿其那塞思黑子孫紅帶收入玉牒甲子以王大臣會刑部夾訊李禧耿飴命審訊大臣宜存大體十一月丙寅朔以博第爲吉林將軍吳禮布爲黑龍江將軍復設川陝總督裁四川總督戊辰賑安徽泗州湖北潛江水災癸酉免浙江山東福建廣東鹽場欠課戊寅上皇太后徽號曰崇慶皇太后次日頒詔覃恩有差己卯以準噶爾遣使請和命喀爾喀扎薩克等詳議定界事宜庚辰調傅鼎爲刑部尙書仍兼管兵部甲申礪曾靜張熙於市都統李禧以贓尙書高起以欺罔俱論斬丙戌命嵇曾筠兼管浙江巡撫以高斌爲江南河道總督設歸化城將軍及副都統辛卯晉封訥親一等公世襲

乾隆元年春正月丙申朔上詣堂子行禮至觀德殿更素服詣雍和門行禮畢

率諸王大臣詣慈寧宮行禮御太和殿受朝不作樂不宜表戊戌命北路參贊大臣薩木哈回京辛丑祈穀於上帝親詣行禮自是每年如之癸卯建京師先蠶壇準噶爾台吉噶爾丹策零遣使貢方物丁未準噶爾貢使吹納木喀入覲召大將軍慶復回京命伊勒慎阿成阿哈岱爲參贊大臣協同額駙策凌辦事駐鄂爾坤命都統王常侍郎柏修往鄂爾坤勘屯田丙辰以顧琮署江蘇巡撫己未署湖南永州鎮總兵崔起潛妄劾鄂爾泰張廣泗褫職逮治南掌入貢庚辰上啟蹕謁陵癸亥上謁昭西陵孝陵孝東陵景陵賑臺灣諸羅縣地震災民賑甘肅固原四川忠州等州縣旱災二月丙寅上還京師戊辰祭大社大稷上親詣行禮自是每年如之以補熙署漕運總督甲戌遣準噶爾來使歸詔以還皇考諭旨酌定疆界齎示噶爾丹策零乙卯賜準噶爾台吉噶爾丹策凌敕書斥所請以哲爾格西喇呼魯蘇爲界及專令喀爾喀內徙庚辰命邁柱兼管工部申飭陳奏謬妄之謝濟世李微陳世倌等加楊名時禮部尙書銜管國子監祭酒事辛酉朝鮮國王李昡遣使進香賞賚如例甲申命改嵇曾筠爲浙江總

督兼管兩浙鹽政郝玉麟以閩浙總督專管福建事戊子定世宗山陵名曰泰陵已丑達賴喇嘛及貝勒頗羅鼐遣使貢方物辛卯以程元章爲漕運總督癸巳尹繼善奏克空稗台雄等寨張廣泗奏克大小丹江等處三月庚子釋汪景琪查嗣庭親族回籍乙巳加上太祖尊諡曰太祖承天廣運聖德神功肇紀立極仁孝睿武端毅欽安弘文定業高皇帝孝慈皇后尊諡曰孝慈昭憲敬順仁徽懿德慶顯承天輔聖高皇后太宗尊諡曰太宗應天興國弘德彰武寬溫仁聖睿孝敬敏昭定隆道顯功文皇帝孝端皇后尊諡曰孝端正敬仁懿哲順慈僖莊敏輔天協聖文皇后孝莊皇后尊諡曰孝莊仁宣誠憲恭懿至德純徽翊天啟聖文皇后世祖尊諡曰世祖體天隆運定統建極英睿欽文顯武大德弘功至仁純孝章皇帝孝惠皇后尊諡曰孝惠仁憲端懿慈淑恭安純德順天翼聖章皇后孝康皇后尊諡曰孝康慈和莊懿恭惠溫穆端靖崇天育聖章皇后聖祖尊諡曰聖祖合天弘運文武睿哲恭儉寬裕孝敬誠信中和功德大成仁皇帝孝誠皇后尊諡曰孝誠恭肅正惠安和淑懿儷天襄聖仁皇后孝昭皇后

尊諡曰孝昭靜淑明惠正和安裕欽天順聖仁皇后孝恭皇后尊諡曰孝恭宣
惠溫肅定裕慈純贊天承聖仁皇后丁未免四川涼山等處番民額賦己酉免
肅州威魯堡回民舊欠庚戌以固原提督樊廷爲駐哈密總督乙卯免廣東歸
善等四縣加增漁稅及通省逋賦夏四月丙寅免江南阜寧等州縣緩征漕糧
壬申命王常海瀾爲參贊大臣協同額駙策凌辦事以高其倬爲湖北巡撫暫
署湖南巡撫戊寅以王士俊爲四川巡撫辛巳貴州提督哈元生褫職逮問裁
直隸副總河以總督兼管河務戊子賜金德瑛等三百三十四名進士及第出
身有差壬辰布魯克巴部諾顏林沁齊壘喇布濟至西藏請上安並貢方物五
月丁未賑河南永城縣水災壬子命江南副總河移駐徐州甲寅免四川南溪
等州縣被風雹額賦乙卯朝鮮國王李昉表賀登極及尊崇皇太后並進方物
乙巳暹羅國王參立拍照廣拍馬嘑六坤司尤提雅菩挨表謝賜扁並貢方物
庚辰免甘肅伏羌等州縣地震傷亡缺額丁銀六月戊辰賑江蘇蕭縣等州縣
水災己巳以慶復署吏部尙書仍兼署戶部事癸酉授張廣泗貴州總督兼管

巡撫事以尹繼善爲雲南總督秋七月癸巳朔以貴州流民多就食沅州免沅州額賦甲午召總理事務王大臣九卿等宣諭密書建儲諭旨收藏於乾清宮正大光明扁額上己亥免貴州通省本年額賦辛丑除古州等處苗賦甲辰免崔起潛罪丙午賑江西安福水災辛亥追諡明建文皇帝爲恭閔惠皇帝賑江南蕭碭等州縣衛水災丁巳賑甘肅隴西等州縣水雹災戊午調鍾保爲湖北巡撫高其倬爲湖南巡撫賑湖北漢川等五州縣衛水災癸酉逮問王士俊尋諭斬賑廣東南海潮陽等縣水災八月戊辰祭大稷大社上親詣行禮自是每歲如之準噶爾部人孟克來降庚午尙書傅鼎有罪免乙卯賑河南南陽等五縣水災乙酉賑喀喇沁飢丁亥兵部尙書通智免以奉天將軍那蘇圖代之調博第爲奉天將軍以吉爾黨阿爲寧古塔將軍賑陝西神木府谷雹災辛卯賑浙江蘭溪等六縣江南溧水等二十四州縣湖北潛江等九州縣衛水災九月丙申免張照哈元生董芳元展成德希壽貽誤苗疆罪丁酉禮部尙書楊名時卒戊戌以慶復爲刑部尙書兼管吏部命傅鼎暫署兵部尙書庚子停本年秋

決癸卯賑浙江安吉等四縣水災丙午上臨大學士朱軾第視疾免江西安福
水災額賦庚戌大學士朱軾卒上親臨賜奠壬子賑安徽宿州等二十州縣衛
水災致仕大學士陳元龍卒乙卯賑江蘇蕭縣等三州縣水災己未御試博學
鴻詞一百七十六人於保和殿授劉綸等官賑江蘇無錫等十三州衛水災準
噶爾台吉車林等來降冬十月壬戌以邵基爲江蘇巡撫乙丑除浙江仁和等
州縣水災額賦庚午調岳濬爲江西巡撫以法敏爲山東巡撫辛未上奉皇太
后送世宗梓宮至泰陵庚辰上奉皇太后還京師十一月甲午上始御乾清門
聽政加嵇曾筠太子太傅命徐本爲東閣大學士仍兼管刑部以孫家淦爲刑
部尙書楊汝穀爲左都御史以額爾圖爲黑龍將軍丙申免雲南楚雄等四府
州縣額賦丁酉賑安徽霍邱等三縣衛湖北漢川等十三縣衛水災己酉冬至
祀天於圓丘上親詣行禮自是每年如之己未賑陝西定邊邠災江南長洲等
十二州縣衛水災十二月辛酉賑巴林郡王等四旗旱災甲子賑江蘇婁溧水
等十三州縣水災乙丑改江南壽春協爲鎮設總兵己巳免陝西府谷神木本

年雹災額賦移南河副總河駐徐州丁丑免安徽泗州衛屯田長蘆廣雲龍地水災額賦丁亥岱林布改江寧將軍以王常爲建威將軍雅爾圖爲參贊大臣免兩淮荒瀆等三場水災額賦是歲朝鮮南掌遰羅安南來貢

二年春正月庚寅朔免朝賀庚子召趙宏恩來京以慶復爲兩江總督調那蘇圖爲刑部尙書以納親爲兵部尙書乙巳以楊超曾爲廣西巡撫內午釋王士俊戊子李衛劾治誠親王府護衛囑託上嘉之賞四團龍褂二月丙寅安南國王黎維祜卒嗣子黎維禕遣使告哀並貢方物癸酉賑江蘇高郵水災戊寅遣翰林院侍讀嵩壽修撰陳倏冊封黎維禕爲安南國王庚辰孝敬憲皇后發引上奉皇太后送至泰陵三月庚寅葬世宗於泰陵孝敬憲皇后附壬辰上還京師癸巳世宗憲皇帝孝敬憲皇后升祔太廟頒詔覃恩有差辛丑命保德等頒升祔詔於朝鮮甲辰涂天相罷以趙宏恩爲工部尙書以顧琮協辦吏部尙書戊申命翰林科道輪進經史奏議庚戌移右衛將軍駐歸化新城增副都統二辛亥調碩色爲四川巡撫壬子調楊永斌爲湖北巡撫四月甲子以旱命刑部

清理庶獄乙卯訓飭建言諸臣己巳疏濬清口並江南運河賑江蘇江甯常州
二府旱災甲戌祀天於圜丘奉世宗配饗次日頒詔覃恩有差是日雨釋傅爾
丹陳泰岳鍾琪丙子免順天直隸額賦己卯召尹繼善來京以張允隨署雲南
總督甲申免湖北漢川等五州縣衛水災額賦南掌入貢丁亥免江蘇蕭陽二
縣水災額賦五月壬辰賜于敏中等三百二十四人進士及第出身有差癸巳
免湖北荊州安陸二府水災額賦乙未賑河南南陽等十二州縣水災戊戌御
試翰林詹事等官擢陳大受等三員爲一等餘各陞黜有差准本年新進士條
奏地方利弊戊申免山東正項錢糧一百萬兩辛亥祭地於方澤奉世宗配饗
除廣東開建恩平二縣米稅乙卯除湖南永州等處額外稅免安徽宿州水災
額賦免浙江仁和等四州縣水災額賦賑陝西商南膚施等縣寇災甲戌以御
門聽政澍雨優渥賜執事諸臣紗疋有差辛酉命直隸試行區田法戊戌賑安
徽石埭等六州縣水災秋七月戊子以永定河決遣侍衛策楞等分赴蘆溝橋
良鄉撫恤災民癸卯命侍衛松福等往文安霸州等處撫恤災民乙未命顧琮

勘永定河衝決各工丙申賑山東德平陽穀等州縣旱愆各災壬寅賑順直宛
平清苑等八十一州縣衛旱災御試續到博學鴻詞於體仁閣授萬松齡等官
丙辰命各省蠲免額賦已輸者抵作次年正賦著爲令賑安徽黟縣等十四州
縣水災八月丁巳朔賑陝西安塞等三縣等災湖南城步縣搖匪平賑撫甘肅
平番等四縣旱災命巡漕御史四員分駐淮安濟寧天津通州甲戌命鄂爾泰
詳勘直隸河道水利丙子以顧琮署直隸河道總督丁丑免江蘇碭山水災未
完額賦十分之七壬午復設貴州威寧鎮總兵官築浙江魚鱗大石海塘免山
東歷城等二十八州縣衛本年旱災額賦甲申賑甘肅會寧旱災福建霞浦等
州縣水災九月辛卯調北路參贊大臣哈岱回京以瑪尼代之乙未準噶爾回
民米爾哈書爾來降乙未以楊永斌爲江蘇巡撫己亥賑福建閩縣等沿海風
災甲辰訓飭科道毋挾私言事召史貽直入都以德沛爲湖廣總督元展成爲
甘肅巡撫賑山西興縣等十二州縣旱災辛亥賑甘肅寧夏縣水災癸丑免雲
南寧州上年夏稅乙卯以那蘇圖署兵部尙書閏九月癸亥免河南西華等四

縣本年水災額賦丁卯以尹繼善爲刑部尙書兼辦兵部事調慶復爲雲南總督以那蘇圖爲兩江總督甲戌賑長蘆蘆台等場水災隨戶除江西袁州饒州二府雜稅丙子馬蘭峪陵工竣辛巳賑福建霞浦等二縣風災壬午賑奉天小清河驛水災以雲南布政使陳宏謀瀆奏本省墾務下部嚴議賑江蘇上元等二十五州縣水災並加賑有差賑貴州安順等府廳縣雹災冬十月乙酉朔賑山西永濟等三縣霜災丁亥修盛京三陵戊子上詣東陵辛卯上謁昭西陵孝陵孝東陵乙未上還京師丙申安西鎮總兵張嘉翰坐剝削軍需論斬以崔紀爲陝西巡撫尹會一爲河南巡撫張楷爲湖北巡撫己亥大學士尹秦乞休溫諭留之癸卯賑山東齊河等二十八州衛水災免江南淳縣本年蟲災額賦桃源等三縣未完銀米丁未賑黑龍江水災戊申修奉先殿辛亥免甘肅平番旱災額賦十一月乙卯賑安徽壽州霍邱旱災免陝西靖邊等八州縣本年水災額賦丁巳朝鮮國王李昰請封世子李愐禮部言年未及歲上特允之癸亥賑貴州郎岱等三廳縣雹災乙丑除山西河津被水額賦丙寅賑安徽太平等十

一州縣衛水災辛未上詣泰陵改總管爲副都統免江南銅山碭山二縣逋賦壬寅祭告泰陵上釋服乙亥賑甘肅環縣蘭州廣東三水等十縣旱災上還京師戊寅皇太后聖壽節御慈寧宮上率諸王大臣行慶賀禮自是每年如之己卯免山西興縣等四州縣旱災丁銀庚辰命仍設軍機處以大學士鄂爾泰張廷玉尙書訥親海望侍郎納延泰班第爲軍機大臣十二月甲申朔漕運總督補熙免以查克丹代之以來保爲工部尙書免江南阜寧上年水災額賦丁亥上御太和殿冊立嫡妃富察氏爲皇后戊子奉皇太后御慈寧宮上率諸王大臣行慶賀禮畢上御太和殿羣臣慶賀頒詔覃恩有差辛卯免江蘇溧水等十二州縣水災額賦壬辰賑陝西府谷等三縣雹災甲午以冊立皇后禮成加上皇太后徽號曰崇慶慈宣皇太后奉皇太后御慈寧宮上率諸王大臣行慶賀禮次日頒詔覃恩有差己亥免直隸本年旱災竈課免甘肅寧夏水災額賦壬寅鄂爾泰封三等伯賑福建閩縣等六縣廣東海康等七縣風潮災大學士邁柱乞病許之琉球貢方物癸卯張廷玉封三等伯辛亥賑涿州水災

三年春正月甲寅朔上初舉元正朝賀率王以下文武大臣詣壽康宮慶賀皇太后禮成御太和殿受賀自是每年元正如之乙卯以福敏爲武英殿大學士馬爾泰爲右都御史辛酉祈穀於上帝奉世宗配享癸亥命舉行經筵甲子上初幸圓明園奉皇太后居暢春園戊辰御正大光明殿賜朝正外藩及內大臣大學士宴癸酉以朱藻爲直隸河道總督顧琮協理河道事丁丑準噶爾噶爾丹策零遣使奉表至京並進貂皮遣侍郎阿克敦充正使御前侍衛旺扎爾乾清門台吉額默根充副使齎敕往準噶爾議定界乙卯上自圓明園還宮辛巳以謁泰陵命鄂爾泰在京總理事務二月丁亥釋奠先師孔子戊子幸圓明園癸巳準噶爾使入覲賞銀幣有差戊戌上謁泰陵己亥上祭泰陵辛丑上幸南苑行圍壬寅上還京師丙午舉行經筵自是每季仲月舉行一次歲以爲常丁未免山東齊河等三十二州縣衛水災額賦辛亥上親耕籍田加一推自是每年如之壬子趙宏恩以納賄奪職以高其倬爲工部尙書張照爲湖南巡撫三月癸丑朔賑福建閩縣等八縣颶風災甲寅上詣太學釋奠御彝倫堂命講中

唐尙書乙卯調崔紀爲湖北巡撫張楷爲西安巡撫己未免江蘇六合等十二州縣水災額賦廣東三水等十州縣旱災額賦辛酉賑江蘇上元等二十五州縣衡水災並免額賦丁卯上詣黑龍潭祈雨辛未免甘肅蘭州等處旱災額賦壬申以旱命刑部清理庶獄癸酉免安徽太平等十一州縣衡水災額賦丁丑免湖北沔陽州通賦夏四月甲申以旱申命求言停督撫貢獻理藩院尙書僧格休致以納延泰代之己丑調孫家淦爲吏部尙書以趙國麟爲刑部尙書孫國璽爲安徽巡撫壬辰命顧琮往直隸會同朱藻辦理河工免長蘆蘆臺等場衡水等州縣水災額賦五月癸丑賑陝西蒲城等十州縣雹災己未賑山東章邱等州縣雹災庚申賑陝西維南等八州縣雹災壬戌貴州定番州苗阿沙等作亂張廣泗討平之辛未調額爾圖爲奉天將軍博第爲黑龍江將軍乙亥免江南松江府額賦辛巳賑陝西靖邊等八州縣旱災六月庚寅賑山東東平等四州縣雹災丙午左都御史楊汝穀乞休允之秋七月壬子起前左都御史彭維新爲原官丁巳免福建詔安縣旱災額賦癸亥免浙江溫州等衛漕欠乙

升調史貽直爲工部尙書高其倬爲戶部尙書丁卯命查郎阿入閣辦事調鄂
彌達爲川陝總督以馬爾泰爲兩廣總督查克丹爲左都御史託時爲漕運總
督大學士尹秦乞休允之八月丙戌江蘇海州山東鄒城等州縣蝗賑湖南石
門縣甘肅武威等三縣水災己丑海望丁憂以訥親暫署戶部尙書己亥奉皇
太后謁泰陵癸卯上詣泰陵行三周年祭禮丙午上奉皇太后駐蹕南苑上行
闕戊申賑安徽望江等四十八州衛旱災九月庚戌朔上奉皇太后還宮免陝
西長安等十五州縣雹災額賦賑山東招遠縣雹災戊午免福建漳浦上年旱
災額賦辛酉命嵇曾筠入閣辦事兼理永定河務裁浙江總督復設巡撫以郝
玉麟仍爲閩浙總督盧焯爲浙江巡撫甲子朱藻解任遣訥親孫家淦往鞫之
以顧琮管總河印務安南入貢己巳大學士尹秦卒編修彭樹葵進十思箴上
嘉贊之賑甘肅礪伯等處旱災丁丑免江蘇江甯等五十二州縣衛水災額賦
並賑之戊寅賑臺灣旱災冬十月庚辰朔賑陝西安定等六州縣雹災辛巳免
山東鄒平等八州縣本年雹災額賦壬午免直隸被水州縣通賦免江蘇安徽

被災各州縣通賦辛卯皇次子永璉薨輟朝五日以御極後親書永璉爲皇太子密旨一切典禮加皇太子儀賑安徽懷甯等五十州縣衛旱災壬辰戶部尙書高其倬卒丙申調任蘭枝爲戶部尙書趙國麟爲禮部尙書史貽直爲刑部尙書以趙殿最爲工部尙書丁酉諡皇太子永璉爲端慧皇太子直隸總督李衛以病免命孫家淦署之己亥賑浙江吉安等州縣旱災庚子朝鮮國王李吟表賀上皇太后徽號並冊封皇后又表謝恩封世子附進方物壬寅上幸田村奠端慧皇太子癸卯免江南江西河南漕欠乙巳授孫家淦直隸總督以甘汝來爲吏部尙書兼兵部楊超曾爲兵部尙書丙午授顧琮直隸河道總督十一月己酉朔復廣東海南道爲雷瓊道改高雷道爲高廉道庚戌以孫家淦劾貝勒允祐上嘉之予議叙允祐下宗人府嚴議壬子賑江蘇華亭等六縣衛旱災賑湖南石門縣旱災癸丑免奉天寧遠等四州縣蟲災額賦賑浙江歸安烏程陝西綏德等四州縣雹災湖北孝感等六州縣旱災癸丑免河南信陽等八州縣旱災額賦賑湖北應山四川忠州等三州縣旱災乙丑免江南淮安徐州二

府湖灘額租免山東招遠縣雹災額賦庚午大學士嵇曾筠以病乞休允之壬申甘肅寧夏地震水涌新渠寶豐縣治沈沒發蘭州庫銀二十萬兩命兵部侍郎班第往賑之乙亥吏部尚書性桂乞休允之丁丑免直隸宣化各府州通賦十二月乙卯朔調訥親爲吏部尚書庚辰賑四川射洪等六縣水災賑兩淮鹽場本年旱災丙戌彭維新視職以魏廷珍爲左都御史丁亥甘肅寧夏地震甲午賑甘肅平番蟲災命大理寺卿汪潛往江南總辦河工琉球國王尙敬遣使表賀登極入貢戊戌準噶爾台吉噶爾丹策零遣哈柳等從侍郎阿克敦等至京師進表乙巳準噶爾使哈柳等入覲諭曰所奏游牧不越阿爾台朕甚嘉之托爾和布延圖卡倫內移不可行

四年春正月己酉上御乾清宮西暖閣召王大臣翰林科道及督撫學政在京者九十九人賜宴賦柏梁體詩丁卯免甘肅寧夏等五縣地震被災額賦壬申大學士嵇曾筠卒趙國麟爲大學士調任蘭枝爲禮部尚書以陳惠華爲戶部尚書二月己卯調張渠爲江蘇巡撫以馮光裕爲湖南巡撫丙戌免直隸滄州

等四州縣興國等四場水災竈地額賦免貴州郎岱等四廳州縣雹災額賦乙未免甘肅靖遠風災額賦丙申準噶爾部人孟克特穆爾等來降免陝西咸寧鎮安水災甘肅柳溝衛蟲災額賦戊戌免湖南永順永綏新闢苗疆鹽課免浙江上虞等縣逋賦庚子準噶爾台吉噶爾丹策零請以阿爾泰山爲界許之免湖北鍾祥等五縣衛旱災額賦三月丁未朔己酉召雅爾圖來京以阿蘭泰爲北路參贊大臣免安徽宿州等四州縣逋賦吏部奏行取屆期上命尙書都御史侍郎保舉如陸隨其彭鵬者免湖北應山上年旱災額賦甲子設熱河兵備道駐承德州命訥親協辦大學士戊辰以旱災特免直隸江蘇安徽三省額賦壬申以魏廷珍爲工部尙書賑直隸文安等六縣水災夏四月丁卯免安徽壽州上年旱災額賦戊寅免江蘇丹陽等七縣旱災額賦辛巳賜莊有恭等三百二十八人進士及第出身有差壬午免長蘆上年旱災逋賦丙戌以旱申命求言命刑部清理庶獄減徒以下罪甲午免四川忠州等三州縣旱災額賦乙未以陳世倌爲左都御史癸卯西藏巴爾布部庫庫木顏布葉楞三汗入貢五月

甲子朝鮮國王李昉謝賜本國列傳進方物戊辰改築浙江海甯石塘辛未致仕大學士馬齊卒癸酉加鄂爾泰張廷玉福敏太保徐本訥親太子太保甘汝來海望鄂善尹繼昌徐元夢孫嘉淦慶復太子少保六月庚辰調碩色爲山東巡撫方顯爲四川巡撫甲辰免甘肅赤金所上年被災額賦山東濟南等七府蝗曹縣河決仍賑被水六州縣災民甘肅秦安等六州縣雹災秋七月戊申額駙策凌奏率兵駐鄂爾海西拉烏蘇並分兵駐鄂爾坤河齊齊爾里克額爾德尼招塔密爾烏里雅蘇臺附近防範準噶爾庚戌以甘肅秦安等十五州縣雹災命無論己未成災悉免本年額賦辛酉賑河南祥符等四十七州縣水災壬戌賑山東海豐等縣場竈戶甲子賑江蘇睢寧等十三州縣衡水雹各災湖北房縣旱災丙寅吏部尙書甘汝來卒以郝玉麟爲吏部尙書宗室德沛爲閩浙總督以班第爲湖廣總督己巳賑安徽宿州雹災庚申安南馬郎叛人矣長等來降賑山東利津等二縣雹災壬申賑直隸開州等州縣江蘇海州等州縣水災江蘇淮安安徽鳳陽等府州蝗八月丙子御史張湄劾諸大臣阻塞言路上

斥爲漸染方苞惡習召見滿漢奏事大臣諭之辛巳賑河南商邱等州縣水災
壬午敘張廣潤經理苗疆功授三等輕車都尉黃廷桂等加銜加級有差戊子
賑山東歷城等六十六州縣衛所水災停征新舊額賦庚寅江蘇金壇縣貢生
蔣振生進手鈔十三經賜國子監學正銜九月乙巳朔署廣西提督譚行義以
安南鄭氏專柄清化鎮邵郡公及黎駕起兵與鄭氏內鬩奏聞丙午免江蘇海
州贛榆二州被水漕糧戊申賑河南祥符等三十七州縣水災有差丁巳上奉
皇太后謁陵庚申上謁昭西陵孝陵孝東陵景陵賑山東臨邑等縣水災癸亥
賑甘肅張掖東樂堡水災賑河南鄧州等四州縣水災山西榆次等三縣旱災
命停征江蘇安徽漕糧上奉皇太后還宮庚午上以疾命和親王弘晷代行孟
冬時饗禮免甘肅秦安等十五州縣糧草三分之一及靈州碾伯等州縣本年
水雹各災額賦冬十月丁丑準噶爾回人伊斯拉木定來降庚辰以江蘇海州
等四州縣水災免通賦甲申端慧皇太子周年上幸田村奠酒乙酉賑山東歷
城等六十六州縣水災給葺屋銀丁亥免陝西興平等十六州縣雹災額賦己

莊親王允祿理親王弘皙等緣事宗人府議削爵圈禁上曰莊親王寬免理親王弘皙貝勒弘昌貝子弘普俱削爵弘昇永遠圈禁弘皎王爵係奉皇考特旨從寬留王號停俸內申釋馬蘭泰己亥額魯特札薩克多羅郡王和碩額駙阿寶之妻和碩格格進順實汗所傳玉璽諭還之壬寅召定邊左副將軍額駙策零來京封弘瞻郡王襲理親王爵癸卯上幸南苑行圍十一月丙午上行大閱禮連發五矢皆中的賜在事王大臣銀幣有差戊申以郝玉麟署兩江總督庚戌召尹會一來京以雅爾圖爲河南巡撫賑江蘇安東等十五州縣水災有差壬申免寧夏次年額賦十二月癸酉朔免山東金鄉等六州衛水災額賦丙子免浙江安吉等州縣漕糧河南羅山旱災額賦戊寅弘皙坐問安泰準噶爾能否到京上壽算如何擬立絞諭免死永遠圈禁安泰論絞免陝西榆林等十一州縣逋賦癸未免河南祥符等四十四州縣水災額賦乙酉晉封貝勒頗羅鼐爲郡王庚寅免河南商邱等十州縣水災額賦壬辰哈柳等入覲甲午召車臣汗達瑪林等賜茶

五年春正月丁未賑安徽宿州等八州縣廬江等十州縣旱災有差丁卯朝
鮮入貢辛未命烏赫圖巴靈阿護準噶爾人赴藏熬茶湖南綏寧苗作亂命馮
光裕等勦之二月琉球入貢乙亥命額駙策凌等定各部落接準噶爾游牧邊
界哈柳歸召入賜茶以和議成嘉獎之辛巳以伊勒慎爲綏遠城將軍癸未工
部尙書魏廷珍罷申諭九卿毋蹈模稜校覆轍免山東章邱等六十州縣衛水災
額賦戊子免湖北襄陽縣衛上年額賦壬辰免上年安徽宿州霍災山東滕縣
等五縣水災額賦戊戌以韓光基爲工部尙書辛丑免湖北漢陽等四縣上年
旱災額賦三月庚戌以尹繼善爲川陝總督鄂善署刑部尙書壬子免直隸雄
縣上年水災額賦甲子免山東霑化等縣場水災額賦庚午湖南栗林鬼冲各
寨苗匪平夏四月丙戌賑兩淮板浦等場災戊子御史褚泰坐受賄論斬免陝
西葭州懷遠旱災額賦己丑以那蘇圖爲刑部尙書甲午以旱召九卿面諭直
隸政事闕失改山東河道爲運河道充沂曹道爲分巡充沂曹三府管河工戊
戌任蘭枝及太常寺卿陶正靖坐朋比下部嚴議五月甲寅上詣黑龍潭祈雨

丙辰命刑部清理庶獄甲子以楊超曾署兩江總督丁卯諭馮光裕及湖廣提督杜愷剿捕城步綏寧盜匪六月癸酉命阿里衮朱必塔查勘山東沂州等處水旱災戊寅命山東江蘇安徽捕除蝻子召張廣泗來京壬辰賑甘肅秦州水災戊戌福州將軍隆昇坐收餽遺褫職勒治閏六月甲辰廣西義甯苗作亂諭馬爾泰赴桂林調度兵事辛亥以喀爾吉善爲山西巡撫命杜愷統率湖南兵至軍前乙卯命張廣泗赴湖南會辦軍務甲子準噶爾台吉噶爾丹策零遣使進表秋七月癸酉調張渠爲湖北巡撫以徐士林爲江蘇巡撫調方顯爲廣西巡撫領色爲四川巡撫朱定元爲山東巡撫乙亥賜噶爾丹策零敕書諭準噶爾使以阿爾泰山爲界山南游牧之人仍居舊地設甘肅安西提督駐哈密丁丑以補熙爲綏遠城將軍辛巳詔停今年秋決甲申張廣泗留辦湖南善後賑安徽宣城饑己丑免安徽鳳陽等十九州縣衛水災無爲等四州縣旱災額賦甲午賑山西徐溝饑丁酉賑甘肅武威等三縣饑戊戌班第奏總兵劉策名等連克長坪各苗寨獲首倡妖言黎阿蘭等八月己亥朔廣西宜山縣蠻匪平

庚子諭曰朕閱江省歲額錢糧雜辦款目沿自前明賦役全書亦未編定官民交受其累其悉予豁免庚戌班第奏剿平鹽井口苗匪各寨壬戌上奉皇太后駐南苑賑福建永定饑免河南中牟等十四州縣水災額賦戊辰譚行義奏安南人立龍彪爲王僭元景興癸酉調楊超曾爲吏部尙書仍署兩江總督史貽直爲兵部尙書韓光基爲刑部尙書陳世倌爲工部尙書辛巳協辦大學士禮部尙書三泰乞休慰留之賑福建上杭饑賑浙江餘杭等十六州縣廳衛所水災丙戌江蘇宿遷縣朱家閘河決命築挑水壩丁亥築江蘇寶山縣吳家濱海塘石壩賑陝西葭州等州縣饑以王安國爲左都御史永定河復歸故道冬十月戊戌朔以常安爲漕運總督壬寅上謁泰陵乙巳上還京師賑四川綿竹等三縣水災甲寅免甘肅平羅本年水災額賦仍免寧夏寧朔半賦丙辰僉都御史劉藻奏請停減圓明園營造上嘉納之賑福建臺灣諸羅風災丁卯張廣泗奏獲苗匪栗賢宇等及附搖匪之戴名揚等克平溪等寨十一月己巳以那蘇圖署湖廣總督庚午調來保爲刑部尙書哈達哈爲工部尙書丙子楊超曾劾

江西巡撫岳濬命高斌往會鞠之己卯召王蔭來京命王安國以左都御史管
廣東巡撫事命阿里袞同高斌勘鞠岳濬以劉吳龍爲左都御史乙酉命廷臣
各舉所知如湯斌陸隴其陳瓊彭鵬諸人賑陝西葭州等六州縣饑十二月壬
寅張廣泗進剿湖南城步綏寧廣西義甯苗犵悉平之免安徽宣城宣州二縣
衛徭災額賦免托克托城等處徭災額賦壬子免山東蒲臺逋賦

六年春正月甲戌裁安西總兵設提督丙子免福建閩縣等五縣逋賦甲申命
鄂爾泰訥親會同孫家淦顧琮勘視永定河工命參贊大臣阿岱駐烏里雅蘇
臺以慶泰爲北路軍營參贊大臣戊子免霸州雄縣額賦甲午命班第仍在軍
機處行走二月御史叢洞請暫息行圍上以飭兵懷遠之意訓之內午以完顏
偉爲南河副總河免湖北鍾祥等四縣衛水災額賦甲寅免陝西葭州等三州
縣徭災額賦庚申增設山西歸化城分巡道三月壬申命侍郎楊嗣璟往山西
會鞠山西學政喀爾欽賄賣生員之獄甲申以御史仲永檀劾鄂善受賄命怡
親王等鞠之鄂善褫職逮問辛卯擢仲永檀爲倉都御史夏四月乙未朔大學

士趙國麟乞休不允免江蘇豐縣等十州縣衛水災蟲災民屯蘆課甲辰免順
天直隸霸州等十州縣上年水災額賦以慶復署兩廣總督張允隨署雲貴總
督己酉賜鄂善自盡五月戊寅免福建臺灣通賦賑江西興國等縣水災貴州
仁懷平越水災六月甲午朔免陝西葭州等六州縣上年水災額賦丙申江蘇
巡撫徐士林給假省親調陳大受署之改張楷爲安徽巡撫庚子命王安國勘
廣東徵糧積弊乙巳以御史李懌劾甘肅匿災命會同尹繼善勘之己酉浙江
巡撫盧焯解任命德沛及副都統汪扎勒勒之賑安徽宿州等十二州縣水災
江蘇山陽等州縣水災趙國麟以薦舉非人降調秋七月免江蘇蘇州等府屬
通賦甲子喀爾欽處斬丙子薩哈諒論斬戊寅甘肅巡撫元展成以御史胡定
劾解任命副都統新桂往會尹繼善勘之癸未詔停今年秋決戊子上初舉秋
獵奉皇太后幸避暑山莊免經過額賦十分之三自是每年皆如之減行圍所
過州縣額賦辛卯賑江西武寧等二縣水災壬辰上至古北口閱兵賑廣東永
安歸善二縣饑八月癸巳賑安徽宿州等十九州縣衛水災庚子上駐蹕張三

營辛丑上行圍賑江蘇山陽等十八州縣荒潰等場水災己酉召楊超曾回京
調那蘇圖爲兩江總督孫嘉淦爲湖廣總督以高斌爲直隸總督完顏偉爲江
南河道總督裁直隸河道總督命高斌兼理直隸河務辛亥召寧古塔將軍吉
黨阿來京以鄂爾達代之九月癸亥朔以陳宏謀爲甘肅巡撫乙丑上奉皇太
后回駐避暑山莊賑廣東南海等二十六州縣饑饉上奉皇太后回蹕壬申授
王恕福建巡撫楊錫紱廣西巡撫甲戌調陳宏謀爲江西巡撫黃廷桂爲甘肅
巡撫免江蘇安徽乾隆三四年被災漕糧己卯調韓光基爲工部尙書以劉吳
龍爲刑部尙書辛巳原任江蘇巡撫徐士林卒授陳大受江蘇巡撫張楷安徽
巡撫賑福建福清等八縣及長福等鎮營饑丁亥以劉統勳爲左都御史冬十
月庚子賑廣東瓊山等二十四州縣颶災丁未賑安徽宿州等三十一州縣衛
水災並免宿州等三州縣額賦漕糧己酉賑甘肅靈州等處饑丙辰賑熱河四
旗丁水災十一月甲子賑兩淮竈戶饑乙丑南掌國王烏孫遣使入貢丙寅賑
甘肅平番等十四州縣雹水災己巳御史李恆陳奏甘肅饑饉情形不實部議

革職上曰與其愆言官而開諱災之端寧從寬假以廣耳目命革職留任戊寅
免江蘇山陽等十五州縣衛水災額賦賑句容等三十四州縣衛饑丙戌皇太
后五旬聖壽節御慈寧宮上率諸王大臣等行慶賀禮十二月乙未劉統勳請
停張廷玉近屬陞轉減訥親所管事務上嘉之丙申大學士張廷玉請解部務
不許辛丑免甘肅武威等二縣五年被水額賦賑江蘇江浦等州縣旱災免湖
南湘鄉等二縣被水額賦乙巳免浙江仁和等十九州縣本年額賦丁未免山
東歷城等十六州縣衛旱災額賦庚戌免甘肅永昌等三縣旱災額賦琉球入
貢調常安爲浙江巡撫顧琮爲漕運總督命劉統勳往浙江會勘海塘賑浙江
嵎縣等十七州縣仁和等場水旱災

七年春正月壬戌調史貽直爲吏部尙書任蘭枝爲兵部尙書以趙國麟爲禮
部尙書庚午定綏遠城右衛歸化城土默特察哈爾共挑兵四千名內扎薩克
首隊兵四千五百名二隊兵六千五百名援應北路軍營並於額爾德尼昭沿
途置駝馬備用戊寅以那克素三十九部番民備辦準噶爾進藏官兵駝馬免

本年額賦甲申賑安徽鳳陽潁州二府泗州一州屬饑民庚寅準噶爾入貢二月辛卯朔上詣泰陵乙未上謁泰陵是日回蹕丙申朝鮮入貢戊戌上幸南苑行圍己亥琉球入貢己酉禮部尙書趙國麟乞休不允乙卯以吉黨阿爲歸化城都統三月庚申朔上憂旱申命求言並飭九卿大臣體國盡職丁卯命大學士九卿督撫舉如馬周陽城者爲言官乙亥以旱命刑部清理庶獄各省如之以晏斯盛爲山東巡撫辛巳準噶爾台吉噶爾丹策零遣使吹納木喀等奉表貢方物乞勿限年貿易壬午以噶爾丹策零表奏狡詐諭西北兩路軍營大臣加意防之戊子上詣黑龍潭祈雨以兩江總督那蘇圖辦賑遺漏切責之夏四月庚寅朔準噶爾貢使吹納木喀等入覲裁入滿獨石口副都統各一增天津副都統一以古北口提督管獨石口外臺站免河南永城等三縣上年被水額賦甲午賜金甃等三百二十三人進士及第出身有差調德沛爲兩江總督那蘇圖爲閩浙總督乙未撥安徽賑銀三十萬兩有奇並准採買湖廣米備糴辛丑賑安徽宿州等州縣衛水災甲辰賜準噶爾台吉噶爾丹策零敕書申誠以

追論舊事屢違定約並諭將此次奏請貿易改道噶斯等事停止仍賞賚如例
甲寅除河南洧川等十一縣水衝地賦免福建福清等七縣饑災額賦丙辰刑
部尙書劉吳龍卒以張照爲刑部尙書五月己未朔以順天保定等八府易州
等五州缺兩命停征新舊錢糧定移駐滿兵屯墾拉林阿勒楚喀事宜設副都
統以巴靈阿爲之戊辰以御史胡定劾寢趙宏恩補刑部侍郎之命癸酉定等
祭典禮御製樂章免江蘇沛縣昭陽湖水沈田畝額賦丙戌禁奏章稱蒙古爲
夷人以琉球國王資送江南遭風難民嘉獎之張允隨奏猛遮界外孟良曾長
召賀罕被逐遁入緬甸六月甲寅諭督撫董率州縣經畫地利戊申訓飭地方
官實心經理平糶秋七月己未命資送日本遭風難民歸國免廣西梧州等三
府屬通賦辛酉除山西繁峙廣西武緣荒地額賦乙丑禮部尙書趙國麟乞休
上責其矯飾褫職調任蘭枝爲禮部尙書陳熙華爲兵部尙書徐本兼管戶部
尙書丙寅命大學士鄂爾泰兼領侍衛內大臣命賑江蘇山陽等州縣水災命
撫恤江蘇阜甯等州縣水災癸未命高斌周學健往江南查辦災賑水利甲申

賑湖北漢川襄陽等州縣衛水雹災並停徵額賦丙戌賑江蘇江浦等十八州縣衛安徽臨淮等州縣衛撫恤江西興國等州縣浙江淳安等州縣湖南醴陵等八州縣山東嶧縣等十州縣衛甘肅狄道等四州縣賑災民八月戊子江南黃淮交漲命疆吏拯救災黎毋拘常例訓飭慎重軍政撥江蘇安徽賑銀二百五十萬兩有奇庚寅免江蘇安徽被水地方本年額賦辛卯定皇后親蠶典禮戊戌免直隸江蘇安徽福建甘肅廣東等省雍正十三年逋賦並免江南浙江未完雍正十三年漕項庚子諭河南等省撫恤江南流民壬寅上奉皇太后幸南苑上行園癸卯賑江西興國水災乙巳上奉皇太后幸晾鷹臺閱園九月丁巳朔撥江蘇運山東截留漕米十萬石備淮徐鳳潁各屬賑糶賑湖北潛江等十州縣水災辛酉免廣東崖州等二州縣風災額賦免安徽鳳潁泗三府州本年水災地方漕賦不成災者折徵之賑湖南湘陰等九縣水災丁卯上詣東陵庚午上謁昭西陵孝陵孝東陵景陵免江蘇山陽等二十一州縣本年被水漕賦壬申上幸盤山賑恤江蘇安徽災銀二百九十萬兩米穀二百二十萬石各

有奇命再撥隣省銀一百萬兩備明春接濟乙亥上幸擘髻山戊寅上回鐸冬十月丙戌撥山東河南明年運漕米各五萬石備江南賑仍由直隸赴古北口外如數採買補運己丑免山東歷城等十九州縣旱災額賦庚寅命江南截留癸亥年漕糧二十萬石仍撥山東漕糧二十萬石河南倉米二十萬石運江南備賑癸巳浙江提督裴貳等以侵欺褫職勒治壬辰賑江蘇山陽等二十八州縣衛饑甲午命清理滯獄乙未命撥山東沿河倉穀十萬石運江南備賑丁酉賑安徽鳳陽二十四州縣衛水災甲辰朝鮮國王李昉表謝國人金時宗等越境犯法屢荷寬典上曰此朕柔遠之恩若恃有寬典犯法滋多非朕保全外藩之本意王其嚴加約束毋俾干紀以塞榜額爲陝西巡撫己酉賑河南永城等十三州縣饑辛亥上詣順懿密太妃宮問疾壬子賑江蘇山陽等七州縣衛水災十一月丙辰朔大學士等奏纂輯明史體例上曰諸卿所見與朕意同繼春秋之翼道昭來茲之鑒觀我君臣其共勉之賑湖北漢川等十二州縣水災饑戊午賑浙江瑞安等縣廳場湖南湘陰等九縣水災庚申福建漳浦縣會匪戕

殺知縣命嚴治之壬戌賑山東膠州十州縣衛水災癸亥賑甘肅狄道等州縣
水雹災乙亥命持法寬嚴務歸平允命陳世倌會同高斌查勘江南水利戊寅
諭明春奉皇太后詣盛京謁陵庚辰以初定齋宮禮是日詣齋宮十二月丙戌
朔賑山東濟寧等七州縣衛饑丁亥命考試薦舉科道人才周學健舉三人皆
同鄉諭飭之命左副都御史仲永檀會同周學健查賑壬辰上奉皇太后幸瀛
臺內子仲永檀鄂容安以漏洩機密逮交內務府慎刑司命莊親王等鞠治免
福建尤溪等四縣荒田溢額銀己亥召安徽巡撫張楷來京調喀爾吉善代之
命寬鄂爾泰黨庇仲永檀罪免直隸薊州等三州縣水災額賦丁未撥運吉林
烏拉倉糧接濟齊齊哈爾等處旱災庚戌賑奉天承德等五州縣饑免山東膠
州等十州縣衛水災額賦辛亥調完顏偉爲河東河道總督白鍾山爲江南河
道總督乙卯諭曰江南水災地畝涸出耕種刻不容緩疆吏其勸災民愛護田
牛或給貲飼養毋得以細事置之

八年春正月丁巳免鄂容安發軍台命仍在上書房行走仲永檀死于獄召孫

嘉淦來京以阿爾賽爲湖廣總督甲子陳世倌等奏修江蘇淮徐揚海安徽鳳
穎泗各屬河道水利下大學士鄂爾泰等大臣議行之己卯命軍機大臣徐本
班第那彥泰隨往盛京辛巳召參贊大臣阿岱塔爾瑪回京以拉布敦烏爾登
代之壬辰內閣學士李紱致仕陞辭以慎終如始對賜詩嘉之辛卯以考選御
史杭世駿策言內滿外漢忤旨褫職調劉於義爲山西巡撫命孫嘉淦署福建
巡撫丙申命尹繼善署兩江總督協同白鍾山料理河務癸卯命侍講鄧時敏
給事中倪國璉爲鳳穎泗宣諭化導使編修涂逢震御史徐以升爲淮徐揚海
宣諭化導使乙巳免湖北漢川等十一州縣衛水災額賦准趙國麟回籍癸丑
遣和親王弘晝代祀先農壇用中和韶樂與上親祭同著爲例賑山東滕縣等
六州縣饑庚午調喀爾吉善爲山東巡撫晏斯盛爲湖北巡撫范璨爲安徽巡
撫丙子上詣壽祺皇太妃宮問疾夏四月甲申朔壽祺皇太妃薨輟朝十日上
欲持服莊親王等祈免訓飭九卿勤事申命各督撫陳奏屬員賢否乙酉上詣
壽祺皇貴太妃宮致奠辛卯命奉宸苑試行區田法丁酉賑安徽鳳陽六府州

屬水災饑免湖北襄陽等三縣水災額賦庚子裁江蘇海防道設淮徐海道駐
徐州府以蘇松巡道兼管塘工揚州府隸常鎮道原設淮徐淮揚二道專管河
工閏四月甲寅朔琉球入貢丁巳御試翰林詹等事官擢王會汾等三員爲一
等餘各陞黜有差辛酉免河南鄭州等十三州縣本年水災額賦甲戌除江蘇
吳江等二縣坍沒田蕩額賦五月癸未朔諭鑾輿巡幸令扈從護軍等加意約
束不得踐踏田禾乙酉御史沈懋華以進呈經史講義召見已去下部嚴議丁
亥命河南停徵上年被水地方錢糧己亥免江蘇山陽等十三州縣牙稅免臨
清商民運徵米船科及銅補商補辛丑賑山東厯城等十八州縣衛饑丙午以
碩色爲河南巡撫紀山爲四川巡撫戊申調慶復爲川陝總督以馬爾泰爲兩
廣總督授張允隨爲雲南總督兼管巡撫事辛酉蘇祿國王麻喊末阿稟勝寄
表請三年一修職貢命仍遵五年舊例六月壬子朔御史陳仁請以經史考試
翰詹不宜用詩賦上嘉之甲寅改南掌爲十年一貢乙卯除江蘇沛縣水沈地
賦丙辰以旱求言戊午命阿里衮暫署河南巡撫丁卯以御史胡定勅湖南巡

撫許容一案究出督撫誣陷扶同予敘壬申諭督撫率屬重農秋七月乙酉上詣順懿密太妃宮問疾丙戌以安南不靖撥及雲南開化都竜廠命張允隨等嚴防之開化鎮總兵賽都請討安南不許戊子上奉皇太后由熱河詣盛京謁陵免經過之直隸奉天地方錢糧撥通倉米四十萬石賑直隸旱災壬辰免山東厯城等十六州縣衛旱災額賦乙未停今年勾決上奉皇太后駐避暑山莊丙申除福建連江等二縣水衝地賦己亥上奉皇太后詣盛京癸卯上行圍於永安莽喀乙巳上行圍於愛里丙午上行圍於錫拉諾海命嚴除州縣徵漕坐倉之弊戊申免直隸滄州被雹竈戶額賦上奉皇太后駐蹕嗎嗎塔喇己酉上行圍至己卯皆如之嚴督撫等漏洩密奏之禁賑湖北興國等三州縣水災並免額賦癸亥萬壽節上詣皇太后行幄行禮御行幄扈從諸王以下大臣官員暨蒙古王以下各官慶賀賜諸王大臣蒙古王等宴甲子上駐蹕巴雅爾圖塔刺乙丑上行圍戊辰上行圍壬申上駐蹕伊克淖爾上行圍至丙子如之甲戌賑四川西昌水災定直隸被旱州縣賑恤事宜賑廣東始興等十六州縣水災

己卯上行圍於巴彥親射羆虎九月庚辰朔上行圍於伍什杭阿親射羆虎辛巳上行圍威準壬午上行圍黃科癸未上行圍阿蘭以哲布尊丹巴呼圖克圖未奏往額爾德尼招禮拜土謝圖汗敦丹多爾濟均下理藩院議處甲申賑陝西商州水災饑乙酉上行圍舍里丙戌上行圍善顏倭赫丁亥上行圍巴彥鄂彌達改荊州將軍調博第爲吉林將軍富森爲黑龍江將軍戊子上行圍尼雅滿珠己丑上行圍珠敦庚寅上行圍英額邊門外是日駐蹕烏蘇河甲午許容以効謝濟世貪縱各款皆虛孫家淦以扶同定案均覲職署糧道倉德以通揭鞠實予叙上駐蹕穆奇村乙未上奉皇太后謁永陵丙申行大饗禮命停顧琮議限民田賑河南祥符等二十一州縣山東齊東等十八州縣衛旱災並免額賦有差辛丑謁福陵壬寅行大饗禮謁昭陵癸卯行大饗禮上奉皇太后駐蹕盛京朝鮮國王李昉遣陪臣至盛京貢方物甲辰上率羣臣詣皇太后宮行慶賀禮御崇政殿受賀賜羣臣及朝鮮使臣宴御大政殿賜酺頒詔覃恩有差乙巳上詣文廟釋奠幸講武臺大閱諭王公宗室大臣等潔蠲禮典訓導兵民毋

忘瀆樸舊俗丙午上親奠克勤郡王岳託及武勤王揚古利墓遣官望祭長白山北鎮醫巫闾山及遼太祖陵戊申上親奠宏毅公額宜都直義公費英東墓免河南帶征乾隆七年以前民欠冬十月庚戌朔上御大政殿賜扈從王大臣宴於鳳凰樓前諭王公宗室等革除陋習恪守舊章免盛京興京等十五處旗地本年額賦及乾隆七年逋賦御製盛京賦辛亥上奉皇太后回蹕乙丑賑廣東南海等七縣水災是日上登望海樓駐文殊菴丁卯命直隸被災各屬減價平糶己巳命部院大臣京察各舉賢自代以劉於義爲戶部尙書阿里衮爲山西巡撫命徐本仍兼管戶部調陳宏謀爲陝西巡撫塞楞額爲江西巡撫庚午賑河南祥符等十四州縣旱災甲戌上奉皇太后還京師丁丑上以謁陵禮成率羣臣詣皇太后宮行慶賀禮御太和殿王大臣各官進表朝賀十一月賑安徽無爲水災並免額賦壬午賑甘肅狄道等二十四州縣水蟲風雹災庚寅安南國王黎維禕表謝賜祭及襲封恩進貢方物辛丑賑廣東萬州等十四州縣水災福建臺灣等三縣旱災壬寅貸黑龍江被旱被霜兵丁等倉糧賑山西曲

沃等十一州旱災癸卯賑直隸天津等二縣旱災丁未賑安徽壽州等九州縣
衛旱災己酉免謁陵經過額賦十分之三十二月庚戌朔賑廣東吳川縣旱災
辛亥命史貽直協辦大學士乙卯賑山東陵縣等十二州縣衛旱災葬端慧皇
太子於朱華山寢園辛酉大學士福敏乞退溫諭慰留甲子準噶爾遣貢使圖
爾都等至京謝進藏人由噶斯路行走賜助牲畜恩並貢方物乙丑以陳惠華
隱匿其弟陝西按察使陳惠正申辨參案密奏下部嚴議惠正褫職鞠治丁卯
以星變示儆詔修省

九年春正月辛巳以徐本病命史貽直爲大學士以劉於義爲吏部尙書協辦
大學士張楷爲戶部尙書陳惠華罷以王安國爲兵部尙書壬午幸瀛臺御大
幄次賜準噶爾使圖爾都宴命立首班大臣末以喀爾丹策零恭順圖爾都誠
敬可嘉召圖爾都近前賜飲三爵錫賚有加訓飭各省州縣教養兼施丁亥賑
直隸天津等十一州縣災庚子王安國憂免以彭維新爲兵部尙書以許容署
湖北巡撫授史貽直文淵閣大學士朝鮮入貢給訥親欽差大臣關防癸卯上

奉皇太后詣秦陵丙午上詣秦陵是日奉皇太后回蹕二月上奉皇太后幸南苑丙辰以給事中陳大珩等奏寢許容署湖北巡撫之命留晏斯盛任仍申誠言官扶同糾論免安徽桐城等九州縣上年水災額賦免福建臺灣等三縣旱災額賦並賑之甲子陳惠華降調丁卯賑雲南霪益二州縣水災丁丑戶部尙書張楷卒以阿爾賽代之鄂彌達爲湖廣總督三月癸未以汪山敦爲工部尙書丁亥免江蘇沛縣河南中牟等六縣旱災額賦丁酉調博第爲西安將軍以巴靈阿爲寧古塔將軍乙巳賑山東德州等五州縣衛旱災以訥親奏查閱河南江南營伍廢弛上曰可見外省大吏無一不欺朕者不可不懲一儆百戊申朔始建先蠶壇成乙卯上詣園丘行大雩禮特詔貶損儀節以示虔禱以旱命省刑寬禁辛未賑山東德平等八州縣旱災己卯諭曰一春以來雨澤稀少皇太后以天時久旱憂形於色今日從寢宮步行至園內龍神廟虔禱朕惶恐戰慄卽刻前往請安諄懇謝罪特諭內外臣工知之戊子祭地於方澤不乘輦不設鹵簿庚寅雨壬寅大學士九卿議覆御史柴潮生請修直隸水利命協辦大

學士劉於義往保定會同高斌籌畫六月己酉大學士徐本以病乞休允之癸丑賑山東歷城等三十二州縣旱災蘭山等六州縣雹災秋七月丙子朔諭直隸災重之天津等十六州縣本年停征新舊錢糧丙戌免江蘇安徽雍正十三年通賦壬辰額爾圖以不職免以達勒黨阿爲奉天將軍八月己酉撫恤安徽歙縣等二十州縣水災戊申免江蘇淮安安徽鳳陽二府雍正十三年通賦癸丑賑四川成都等州縣水災乙丑予告大學士徐本回籍上賜詩寵行賞賚有加並諭行幸南苑之日親臨慰問丙寅免直隸天津等三十一州縣上年通賦己巳上奉皇太后幸南苑上行圍九月己亥朔以翰林院編修黃體明進呈講章牽及搜檢太嚴隱含諷刺下部嚴議褫職乙未免山西清水河本年雹災額賦癸卯賑山東博興等縣旱災丁未改明年會試於三月舉行己酉以陳世倌假滿命入閣辦事賑山西文水等縣水災庚戌以四川學政蔣質心教士命留任乙卯上奉皇太后幸湯山江南河南山東蝗癸亥上幸盤山丁卯上奉皇太后還宮庚午重修翰林院工竣上幸翰林院賜宴分韻賦詩復御製柏梁體

詩首句羣臣以次庶續賜掌院大學士鄂爾泰張廷玉御書扁額及翰林詹事諸臣書幣有差是日幸貢院賜御書聯額復幸紫微殿觀象臺賑直隸保定等十八州縣水蟲雹等災賑江蘇靖江等十二州縣衛潮災安徽歙縣二十州縣衛水災庚辰起孫嘉淦爲宗人府府丞辛巳除直隸涿州等三州縣水衝地賦丙戌山東登州鎮總兵馬世龍以科派兵丁鞠實論絞賑甘肅河州等三十州縣衛雹水各災辛卯以江西學政金德瑛取士公明命留任己亥以貴州學政佟保守潔士服命留任丙午鄂爾泰議覆劉於義奏勘直隸水利命撥銀五十萬兩興修丁未免浙江仁和等三十一州縣所旱災額賦並賑之辛亥賑成都等三十州縣水災壬子允準噶爾貢使哈柳等隨帶牛羊等物在肅州貿易甲子免山東歷城等三十二州縣衛本年旱雹等災額賦乙丑免直隸保定等十一州縣廳本年水旱蟲雹災額賦丙寅賞雷鉉額外諭德食俸戊辰張照丁憂調汪由敦爲刑部尙書以趙宏恩爲工部尙書免安徽歙縣等二十一州縣衛水災額賦辛未以福建閩縣等縣火災諭責疆吏不嚴火備羅卜藏丹怎

就獲十年春正月丙子召大學士內廷翰林於重華宮聯句改會試於三月著爲令乙未大學士鄂爾泰以病乞解任溫諭慰留己亥準噶爾遣使哈柳貢方物庚子召高斌來京以劉於義署直隸總督己酉賑浙江淳安等四縣上年水災朝鮮入貢辛亥上幸內右門直廡視鄂爾泰疾己未上謁昭西陵孝陵孝東陵景陵庚申免廣東海陽等二縣上年水災額賦甲子免江蘇丹徒等十州縣衛上年水災額賦丁卯上還京師己巳免山東博興等二縣乾隆九年旱災額賦庚午高斌回直隸總督三月癸酉朔日食乙亥改殿試於四月著爲令賑雲南白鹽井水災庚辰上幸鄂爾泰第視疾辛巳加鄂爾泰太傅己丑協辦大學士禮部尙書三泰乞休允之庚寅命訥親協辦大學士調來保爲禮部尙書以盛安爲刑部尙書癸巳免浙江仁和等三十州縣上年旱災額賦甲午以安南莫康武作亂攻陷太原高平等處命那蘇圖等嚴防邊隘乙未加史貽直陳世倌來保高斌太子太保劉於義張允隨張廣泗太子少保夏四月癸卯朔發江南帑銀五十六萬兩濬河道己巳免山東海豐等二縣被旱額徵糧課乙卯大

學士鄂爾泰卒上臨奠輟朝二日命遵世宗遺詔配饗太廟召那蘇圖來京以策楞爲兩廣總督調準泰爲廣東巡撫以魏定國爲安徽巡撫庚申召蔣溥來京以楊錫紱爲湖南巡撫壬戌飭沿海各省訓練水師癸亥以旱命刑部清理庶獄戊辰策試貢士詔能深悉時政直言極諫者聽己巳慶復紀山奏進勦瞻對番五月壬申朔賜錢維城等三百三十三人進士及第出身有差丁亥除江蘇蘇州等九府坍沒蘆課頒御製太學訓飭士子文於各省學宮同世祖臥碑文聖祖聖諭廣訓世宗朋黨論朔望宣講命訥親爲保和殿大學士辛卯戶部尙書阿爾賽爲家奴所害磔家奴於市以高斌爲吏部尙書那蘇圖爲直隸總督命高斌劉於義仍辦直隸水利河道以梁詩正爲戶部尙書己亥命劉於義兼管戶部事務六月丁未普免全國錢糧諭曰朕臨御天下十年於茲撫育蒸黎躬行儉約薄賦輕徭孜孜保治不敢稍有暇逸今寰宇敉寧左藏有餘持盈保泰莫先足民天下之財止有此數不聚于上卽散于下我皇祖在位六十一年蠲租賜復之詔史不絕書普免天下錢糧一次我皇考無日不下減賦寬征

之令如甘肅一省正賦全行豁免者十有餘年朕以繼志述事之心際重熙累治之後欲使海澨山陬俱沾大澤爲是特頒諭旨丙寅年直省應徵錢糧其通蜀之庚戌免安徽鳳陽等州府連年被災地方耗羨命戶部侍郎傅恒在軍機處行走辛酉御史赫泰請收回普免錢糧成命上斥其悖謬褫職癸亥上詣黑龍潭祈雨秋七月辛未朔免甘肅寧夏等三縣逋賦癸酉以順直宛平等六十四廳州縣缺雨命停征錢糧乙酉命高斌仍兼直隸河道總督戊子賑安徽壽州等十八州縣衛水災雹災壬辰上奉皇太后幸多倫諾爾免經過州縣額賦十分之四戊戌上奉皇太后駐避暑山莊賑安徽宿州等州縣衛水災八月癸卯賑兩淮莞瀆等三場水災停征湖北漢川等十七州縣水災光化等二縣雹災額賦並賑之上奉皇太后幸木蘭行圍甲辰上駐波羅河屯賜青海蒙古王公宴並賚之丁未上行圍永安莽喀戊申上行圍畢雅喀拉己酉上行圍溫都里華辛亥上行圍額爾袞郭賜蒙古王額駙台吉等宴癸丑上行圍布爾噶蘇台甲寅上行圍巴彥溝乙卯上行圍烏里雅蘇台賜王大臣蒙古王額駙台吉

等宴丙辰上行圍畢圍舍爾賑直隸宣化府屬旱災丁巳上行圍阿濟洛鳩和洛戊午上行圍僧機圖己未上行圍永安湃庚申上行圍英圖和洛辛酉上行圍薩達克圖壬戌賑湖北宜城等三州縣衛水災癸亥上行圍老圖博勒齊爾乙丑上行圍庫爾奇勒丙寅賑甘肅安定等三縣廣東電白等二縣旱災海豐蟲災南澳風災上駐多倫諾爾丁卯賜王大臣蒙古王額駙台吉等宴賑山西曲沃等十二州縣水災九月庚午朔上行圍額爾托昂色欽辛未上行圍多倫鄂博圖壬申遣祭明陵上行圍古哲諾爾癸酉張允隨以猛緬土司奉廷徵等通緬莽請改土歸流命詳議上行圍塔奔陀羅海乙亥賑河南永城等五縣水災上行圍札瑪克圖丙子上行圍屯爾呼丁丑賑直隸故城等十五州縣衛旱災癸未上駐宣化府甲申上閱宣化鎮兵丁亥賑山東濟甯等六州縣衛水災海豐旱災癸巳上奉皇太后還京師甲午授鄂彌達湖廣總督賑兩淮廟安場水災丁酉以普免錢糧命查各省歷年存餘銀以抵歲需戊戌授尹繼善兩江總督命修明愍帝陵賑江蘇淮徐海被災州縣慶復奏收撫上瞻對進剿下

略對班滾克加社了等卡及南路各寨賑陝西長安等六縣水災冬十月丁未以甘肅甘山道歸併肅州道戊申賑河南商邱等五縣水災辛亥裁通政使司漢右通政一丙辰命塞陳家浦決口戊午命四川嚴查囑匪禮部尙書任蘭枝乞休允之癸亥免江蘇海州等七州縣漕糧甲子給江南災民葺屋銀賑江蘇江浦等二十一州縣衛水災乙丑賑湖南湘陰等三縣湖北漢川等二十一州縣衛旱災丙寅除湖北當陽等二縣衛水衝地賦十一月庚午賑順直香河等四十八州廳縣旱災陝西興平等六縣水災辛未賑山東滕縣等七州縣衛水災壬申以王安國爲禮部尙書甲戌賑兩淮廟灣等場水災乙亥傳清奏準噶爾台吉噶爾丹策零與阿卜都爾噶里木汗構兵丁丑賑山西大同等十八州縣旱霜雹災湖北巡撫晏斯盛乞養以開泰代之辛巳賑廣西思恩等縣旱災壬午準噶爾台吉噶爾丹策零卒命西北兩路籌備邊防乙酉賑廣東海陸等四場風災戊子免安徽宿州等五州縣水災地方漕糧庚寅陳家浦決口合龍癸巳賑直隸宣化府屬及慶雲縣旱災十二月辛亥大學士福敏乞休優詔允

之加太傅壬子命慶復爲文華殿大學士留川陝總督任命高斌協辦大學士賑陝西隴西等州縣旱災賑淮北板浦等場水災乙卯命協辦大學士高斌侍郎將溥均在軍機處行走

高宗本紀二

十一年春正月庚午以紀年開表命減刑癸未命慶復進勦瞻對爲李質粹聲援辛卯賑江蘇銅山安徽宿州等州縣飢甲午朝鮮入貢李質粹進攻靈達班滾之母赴營乞命仍縱歸上飭其失機諭慶復督兵前進二月戊戌賑山西大同等十二州縣飢辛丑召北路軍營參贊大臣拉布敦烏勒來京以塔爾瑪善努登代之癸卯上幸南苑行圍丁未免廣東新甯等州縣雲南鶴慶府水災額賦辛亥以三月朔日食詔修省以實定皇后不行親蠶禮之年遣妃代行丙辰免河南永城等五縣水災額賦庚申西藏台吉冷宗鼎以攻瞻對擅撤兵論斬諭宥其死三月己巳免直隸鹽山等八州縣水災額賦甲戌賑雲南白鹽井水災乙亥準噶爾台吉策旺多爾濟那木札勒以新立遣使哈柳貢方物請派人往藏熬茶戊寅慶復至打箭鑪勦李質粹等老師旣寇請續調官兵進勦允之辛巳遣內大臣班第等赴瞻對軍營壬午賜哈柳等宴召見允其往藏熬茶頒

如意賚之甲申賜準噶爾台吉策旺多爾濟那木札勒敕予故台吉噶爾丹策零布施內申免湖北潛江等州縣上年水災額賦慶復奏進駐靈雀閏三月丁酉朔飭陝西修列代陵墓庚子召白鍾山來京命顧琮署江南河道總督高斌暫管之以劉統勳署漕運總督賑直隸宣化府飢賑甘肅隴西等十二州縣水旱雹霜災丙午命汪由敦署左都御史癸丑左都御史杭奕祿休致以阿克敦代之夏四月丁丑白鍾山褫職發南河効力戒軍機處漏洩機密以鄂昌署廣西巡撫丁亥免湖南湘陰等五縣水災額賦己丑免廣東新寧等四州縣水災額賦五月丙申朔以盛安爲左都御史阿克敦爲刑部尙書丁酉諭顧琮查明南河虛糜之款令白鍾山賠補壬寅免山西大同等十八州縣上年旱霜各災額賦丙午慶復奏進攻贍對番會班滾計日授首加慶復太子太保戊申免甘肅靖遠等三縣上年旱災額賦己酉永除直隸慶雲縣每年額賦十分之二乙卯達賴喇嘛等請宥班滾不許以傳清代奏嚴飭之六月丙寅慶復班第等會攻了魯尼日寨克之班滾自焚死丁卯以打箭鑪口內外番從征効力再免貢

賦二年丙子京城地震壬辰命送還俄羅斯逃人于恰克圖秋七月丙申加那蘇圖策楞太子少傅銜周學健太子少保銜丁酉命高斌赴江蘇察看黃運工程劉於義署直隸河道總督壬寅四川大乘教首劉奇以造作逆書磔於市庚戌周學健奏捕天主教二千餘人上以失綏遠之意宥之壬戌賑湖北漢川等七縣水災癸亥以雲南張保太傅邪教蔓延數省諭限被誘之人自首其仍立教堂者捕治之丁卯召吉林將軍巴靈阿來京命阿蘭泰代之賑直隸慶雲等七縣場旱災己巳以四川提督李質粹進勦瞻對欺飭能之免廣甯等處旗地水災賦辛未賑湖南益陽等四州縣水災癸酉加賞江蘇安徽被水災民修葺房屋銀乙酉賑山東金鄉等十一州縣水災庚寅上御瀛臺賜宗室王公等宴改崇雅殿爲敦敘殿辛卯上御瀛臺賜大學士九卿翰林科道等宴宣示七言律詩四章壬辰福建上杭縣民羅日光等糾衆請均佃租滋事捕治之癸巳允朝鮮國王請停奉天設忙牛哨汛兵九月甲午朔除浙江歸安等三縣沙積坍卸地賦戊戌訓督撫實心行政賑山東滕縣等三州縣兩淮板浦等六場水

災己亥命高斌往奉天疏濬河道辛丑停今年秋決以周學健爲江南河道總督調陳大受爲福建巡撫以安甯署江蘇巡撫定欽差大臣巡閱各省營伍例賑河南鄭州等三州縣水災壬寅命訥親兼管戶部免甘肅隴西等九州縣水災額賦癸卯上奉皇太后啟蹕詣泰陵並巡幸五臺山丁未上謁泰陵己酉阿里袞患病以班第署山西巡撫庚戌資經過直隸州縣耆民甲寅賑江蘇豐縣等三州縣雹災乙卯上駐蹕五臺山射虎以山西風俗醇樸諭疆吏教養兼施小民崇習禮讓丙辰免山西五臺縣明年額賦十分之三丁巳召馬爾泰來京以喀爾吉善爲閩浙總督調塞楞額爲山東巡撫陳宏謀爲江西巡撫以徐杞爲陝西巡撫庚申上奉皇太后回蹕壬戌召鄂彌達來京以塞楞額爲湖廣總督調阿里袞爲山東巡撫愛必達爲山西巡撫賑河南鄆陵等二十六州縣水災冬十月甲子賑山西陽曲等二十二州縣水雹各災丁卯上閱滹沱河隄賑湖北漢川等九州縣衛水災庚午上奉皇太后駐蹕保定府壬申上閱兵賜銀幣有差甲戌以張廣泗發摘逆犯魏王氏劉奇等予敘定加山西歸綏道兵備

銜稽查靖遠營戊寅上奉皇太后還京師調開泰爲江西巡撫陳宏謀爲湖北巡撫庚辰免張廷玉帶領引見並諭不必向早入朝及勉強進內壬午命汪由敦軍機處行走癸未御史萬年茂以劾學士陳邦彥等獻媚傅恒不實褫職戊子免安徽壽州等二十三州縣水災額賦辛卯撥賑江蘇淮揚徐海各屬災民銀糧二百二十萬兩石有奇十一月癸巳寢甄別科道之命御史李兆鉉下部議處乙未以河南學政汪士鋐考試瞻徇褫職免江蘇山陽等二十四州縣衛水災額賦並分別蠲緩漕糧有差乙巳除奉天錦縣等二縣衝壓地賦己酉予故內閣學士張若靄治喪銀並諭張廷玉節哀自愛辛亥李質粹發軍前効力戊午慶復奏大金川土司莎羅奔擾小金川倘不遵剖斷惟有用番力以收功上是之十二月癸亥召班第來京以陶正中護山西巡撫甲子賑湖北潛江等七州縣衛水災乙丑以傅清奏達賴喇嘛看茶之綏綳喇嘛鎮壓郡王頗羅鼐賜手敕慰解之並諭以與達賴喇嘛同心協力保安地方戊辰以瑚寶爲駐防哈密總兵甲戌免直隸靜海蟲災額賦並賑之丁丑以張廷玉年老命其子庶

吉士張若澄在南書房行走俾資扶掖戊寅賑甘肅安定等州縣旱災免山東金鄉等八州縣水災額賦庚辰除廣西永福永衝地賦癸未準噶爾台吉策安多爾濟那木札爾遣使瑪木特等入覲召見於太和齋己丑賑蘇尼特阿巴噶等旗災陳大受奏蘇祿國遣番官齎謝恩表番字漢字二道與例不符卻之仍優給番官令回國上嘉爲得體

十二年春正月壬辰命王保辦理準噶爾使赴藏事務甲午免山西太原等六府八州及歸化城額征本色十分之三大同朔平二府全蠲之乙未賜瑪木特宴於豐澤園戊戌免江蘇海州等三州縣及板浦等六場民竈舊欠丁未賑山東壽光等十三州縣飢乙卯賜準噶爾台吉策旺多爾濟那木札勒敕允所遣西藏念經人在哈集爾得卜特爾過冬及貿易二月辛酉朔免吉林上年旱災應交租穀壬申上謁昭西陵孝陵孝東陵景陵紀山奏大金川土司侵革布什咱土司誘奪小金川土司澤旺印信諭飭修守禦毋輕舉動甲戌上幸盤山庚辰賑山東蘭山饑壬午除河南孟縣衝坍衛地額賦癸未上還京師戊子原任

內務府大臣丁皂保年屆百齡賜御書扁額朝服綵幣免湖北棗陽上年水災額賦三月免山西陽曲等二縣上年水災額賦辛丑召慶復入閣辦事調張廣泗爲川陝總督復設雲貴總督以張允隨爲之命圖爾炳阿爲雲南巡撫孫紹武爲貴州巡撫賑河南水災以大金川土司掠革布什咱明正各土司擾及川地命慶復留四川同張廣泗商進勦並飭張廣泗撫馭郭羅克曲曲烏瞻對巴塘諸番免江蘇淮安等四府州屬上年水災額賦大學士查郎阿乞休允之乙巳西藏郡王頗羅鼎卒以珠爾默特那木札勒襲封郡王丙午以高斌爲文淵閣大學士來保爲吏部尙書調海望爲禮部尙書傅恆爲戶部尙書命索拜駐藏協同傳清辦事免安徽壽州等二十三州縣衛上年水災額賦丁未命副都統羅山以原銜管阿爾泰軍臺並都達布遜諾爾馬廠事務己酉命張廣泗進勦大金川土司莎羅奔西路軍營參贊大臣保德期滿以那蘭泰代之庚戌免直隸薊州等十四州縣廳上年水災額賦戊辰命高斌往江南會同周學健查勘河工並清理錢糧積弊己巳以那蘇圖署直隸河道總督壬午給訥親欽差

大臣關防命往山西會同愛必達讞安邑等二縣聚衆之獄甲申召雅爾圖回京丁亥五月辛卯召準泰來京以策楞兼管廣東巡撫丙申賑山東安邱等二縣飢甲辰祭地於方澤以旱屏鹵簿乙巳命刑部清理庶獄減徒以下罪己酉上詣黑龍潭祈雨辛亥愛必達免調準泰爲山西巡撫壬子以福建山東江南廣東山西迭出挾制官長之獄諭頑民聚衆干犯刑章不得不引爲已過各督撫其諄切化導使愚民知敬畏官長服從教令六月庚申朔諭來春奉慈輿東巡親奠孔林命各衙門豫備事宜辛未命貴州巡撫節制通省軍務崔備以不查劾州縣虧空褫職發軍臺効力壬申賑山東益都等七州縣飢丙子小金川土司澤旺率衆降並歸沃日三寨官兵進勦大金川攻毛牛及馬桑等寨克之召慶復回京秋七月己丑朔撫恤山東歷城等二十州縣衛水雹各災命高斌等疏濬江蘇六塘等河丙申命納延泰賑蘇尼特等六旗旱災癸卯停劉於義兼管戶部以訥親代之丙午賑順直固安等七十五廳州縣水旱雹災戊申上奉皇太后幸避暑山莊癸丑張廣泗進駐小金川美諾寨分路攻勦受小金川

降乙卯上奉皇太后駐避暑山莊戊午賑長蘆永利等三場旱災竈戶八月辛酉上奉皇太后幸木蘭行圍內寅賑長蘆海豐等二縣竈戶戊辰上行圍溫都爾華賜蒙古王公台吉等宴辛未採買熱河八溝等處米賑蘇尼特六旗旱災癸酉賑江蘇蘇松等屬潮災丙子命賑蘇尼特六旗銀均用庫帑免扣王貝勒等俸辛巳慶復奏進攻刮耳哇連戰克捷諭小小破礮克寨何以慰朕壬午賑浙江壽昌等三縣水災乙酉賑順直霸州等十五州縣水災賑湖南來陽等九縣陝西朝邑廣東順德等三縣水災九月戊子朔免經過地方額賦十分之三賑甘肅伏羌等十縣雲南安寧等三州縣旱災上奉皇太后回駐避暑山莊癸巳以江蘇崇明潮災淹斃人民一萬二千餘口免明年額賦仍賑之乙巳賑安徽歙縣等八州縣衛河南通許等二十七州縣山東齊河等八十七州縣水災丁酉上奉皇太后回蹕乙巳撥奉天糧十萬石賑山東丁未致仕大學士查郎阿卒戊申諭江蘇清查積欠以陳維新與侍郎陳惠華規避均褫職壬子賑河南許州水災甲寅以顧琮爲浙江巡撫蘊著爲漕運總督乙卯賑兩淮呂田

等二十場水災丁巳以陳大受爲兵部尙書調潘思桀爲福建巡撫以納敏爲安徽巡撫冬十月辛酉以蘇祿復遣番人至福建申理呂宋番目規奪貢使事諭烏夷互爭可聽其自辦不必有所袒護乙丑上以皇太后疾詣慈寧宮問安視藥是日宿慈寧宮每日視藥三次至辛未皆如之庚午賑江蘇旱災等二十州縣衛水災丁丑免吉林被水地方額賦戊寅賑浙江海寧等十一縣水災己卯以準噶爾赴藏熬茶宰桑巴雅期朗朗等至得卜特爾交易召慶復回京壬午賑江蘇常熟等十九州縣衛潮災上元等十五州縣衛旱災命江蘇復截明歲漕糧四十萬石備賑癸未諭張廣泗勿受莎羅奔降十一月丁亥朔上詣皇太后視藥日三次至己丑皆如之召阿里衮來京以赫赫護山東巡撫癸巳賑浙江壽昌等三縣飢補豁被災額賦己酉額駙策凌陞見以塔爾瑪善暫署定邊左副將軍庚戌賑江蘇崇明等縣災民有差癸丑賑山東東平等州縣衛災民辛酉賑安徽歙縣等州縣衛水災己巳召徐杞來京調陳宏謀爲陝西巡撫以彭樹葵署湖北巡撫賑山東齊河等八十五州縣水災辛未予告大學士徐

本卒乙亥以張廣泗進勦大金川命黃廷桂署陝甘總督賑直隸天津等六州縣水災張廣泗奏莎羅奔請降告以此次用兵不減不已上用卿得人勉之己卯以大學士慶復進勦瞻對奏報班滾自焚不實命褫職待罪以班第努三均奏班滾自焚罷御前行走庚辰以來保爲武英殿大學士

十三年春正月壬辰賑江蘇阜甯等縣安徽宿州等五州縣水災庚子命傅恒兼管兵部尙書事辛丑命納親赴浙江同高斌會鞠巡撫常安乙巳命阿克敦協辦大學士傅恒協辦巡幸內閣事務戊申上至曹八屯甲寅大學士張廷玉乞休溫諭慰留之停兼理吏部以來保代之二月戊午上東巡奉皇太后率皇后啟鑾癸亥上駐蹕趙北口奉皇太后閱水圍朝鮮琉球入貢甲子賑直隸天津等十五州縣水災內寅常安坐焚收視職壬申福建甌甯會匪作亂總兵劉啓宗捕勦之癸酉加經過山東被災州縣賑一月罷奇通阿領侍衛內大臣以阿里袞代之乙亥免直隸山東經過直隸山東州縣額賦十分之三戊寅上駐蹕曲阜縣免駐蹕之山東曲阜泰安歷城三縣己巳年額賦己卯上釋奠禮成

謁孔林詣少昊陵周公廟致祭命留曲柄黃轍供大成殿賜衍聖公孔昭煥及博士等宴壬午上駐蹕泰安府癸未上祭岱嶽廟奉皇太后登岱三月乙酉減直隸山東監候緩決及軍流以下罪丁亥命班第赴金川軍營協商軍務諭張廣泗班第調岳鍾琪赴軍營以總兵用戊子至上至濟南府幸趵突泉己丑上奉皇太后閱兵謁帝舜廟庚寅上閱城幸厯下亭免浙江餘姚等五縣潮災本年漕糧壬辰上奉皇太后率皇后回蹕癸巳免安徽歙縣等七州縣衛上年被水額賦乙未上至德州登舟皇后崩命莊親王允祿和親王弘晝奉皇太后回京上駐蹕德州召完顏偉回京以顧琮爲河東河道總督愛必達爲浙江巡撫協辦大學士吏部尙書劉於義卒辛丑還京師大行皇后梓宮至京奉安於長春宮上輟朝九日壬寅四川成都等二十三州縣地震甲辰皇太后至京師上迎還壽康宮乙巳上至長春宮大行皇后梓宮前致奠丙午上親定大行皇后諡曰孝賢皇后以皇長子屆喪未能盡禮罰師傅諳達等俸有差丁未上至長春宮大行皇后梓宮前行殷奠禮命高斌劉統勳查辦山東賑務己酉大行皇

后梓宮移觀德殿頒大行皇后敕諭於各省遣官宣敕諭於朝鮮及內札薩克喀爾喀哈密青海等處辛亥調愛必達爲貴州巡撫以方觀承爲浙江巡撫丁巳加傅恒那蘇圖張廣泗班第太子太保喀爾吉善太子少保庚申召駐藏副都統傅清來京以拉布敦代之正白旗領侍衛內大臣伊勒慎卒以那蘇圖旺札勒署來保免兼領侍衛內大臣以豐安代之壬戌上至觀德殿祭大行皇后甲子命訥親經略四川軍務協辦大學士阿克敦免以傅恒代之並兼管吏部尙書哈達哈署兵部尙書免上年江蘇常熟等十六州縣衛潮災上元等十四州縣衛旱災額賦乙丑調梁詩正爲兵部尙書以蔣溥爲戶部尙書免江蘇山陽等十八州縣衛上年被災額賦丁卯軍機大臣蔣溥免以陳大受代之癸酉以陳大受協辦大學士達勒當阿爲刑部尙書乙亥起原任川陝總督岳鍾琪赴金川軍營賞提督銜調阿蘭泰爲盛京將軍以索拜爲寧古塔將軍丙子起傅爾丹爲內大臣赴金川軍營加賑福建臺灣等二縣旱災戊寅晉一等侯富文爲一等公庚辰裁都察院僉都御史通政司右通政大理寺少卿詹事府少

詹事太僕寺少卿國子監司業漢缺各一改通政司滿參議一缺爲右滿漢左
通政爲通政副使五月甲申朔賜梁國治等二百六十四人進士及第出身有
差乙酉免直隸文安等三十二州縣廳上年被水額賦丙戌命傅恒署戶部三
庫事庚寅阿克敦論斬辛卯張廣泗奏克戎布寨之捷丁酉免河南通許等二
十八州縣水災額賦壬寅免安徽旌德等七州縣衛上年旱災額賦甲辰上至
觀德殿册諡大行皇后曰孝賢皇后頒詔丙午釋阿克敦於獄命署工部侍郎
戊申免山東永利等八場上年水災額賦壬子免山西永濟等十二州縣上年
水雹災額賦六月丙辰李垣以祭祀久不到班奪伯爵申誠旗員庚申御試翰
林詹事等官擢齊召南等三員爲一等餘陞黜有差御試由部院入翰林詹事
等官擢少詹事世貴記名陞用癸亥賑陝西耀州等二十二州縣旱災戊辰四
川汶川縣典史謝應龍駐沃日土司阻鎮將移營上嘉之予州同銜己巳命兆
惠兼管戶部事庚午裁歸化城土默特左右翼副都統甲戌諭禁廷臣請立皇
太子並責皇長子於皇后大事無哀慕之誠上至觀德殿孝賢皇后梓宮前奠

酒行百日致祭禮秋七月癸未朔皇太后懿旨嫺貴妃那拉氏繼體坤寧先册立爲皇貴妃攝行六宮事丁亥免福建長樂等二縣上年旱災額賦戊子諭納親等速奏進兵方略壬辰貸山東農民籽種銀免江蘇宿遷上年水災額賦甲午命高斌會周學健勘河湖疏洩事宜乙未以山西永濟等五縣歉收撫恤之戊戌德沛免調達勒黨阿爲吏部尙書以盛安爲刑部尙書辛丑賑直隸青縣等二十九州縣旱災癸卯阿里袞請減飢民掠奪罪諭斥爲寬縱養奸不許賑山東厯城等二十九州縣水雹等災丙午常安論絞閹七月癸丑朔以阿克敦署刑部尙書德通爲左都御史丙辰免直隸朔州固安水災額賦賑湖南益陽等八州縣水災戊午以彭樹葵爲湖北巡撫戊辰周學健以違制薙髮逮下獄命高斌管南河總督尹繼善以瞻徇礙職留任己巳上幸盤山以新柱署湖廣總督召安甯來京以尹繼善兼理江蘇巡撫寧古塔將軍索拜遷古北口提督以永興代之辛未以訥親奏金川進剿持兩議諭斥之並申飭博爾丹岳鍾琪班第等壬申上駐蹕盤山癸酉調準泰爲山西巡撫阿里袞爲山東巡撫鄂昌

爲江蘇巡撫舒輅爲廣西巡撫塞楞額以違制薙髮逮下獄丁丑賑雲南昆陽等州縣水災戊寅召阿里衮來京以唐綏祖護山東巡撫己卯免江蘇元和等十縣本年雹災額賦庚辰上還宮八月甲申以班第署四川巡撫乙酉以謁泰陵命莊親王允祿等總理在京事務癸巳追議征贍對証奏罪下慶復於獄許應虎論斬庚子諭撫恤四川打箭爐地震災民命來保兼管工部尙書辛丑上詣泰陵甲辰召安甯來京乙巳上謁泰陵丙午免直隸慶雲等二縣九年述賦丁未命戶部侍郎兆惠赴四川軍營督運訥親請調兵三萬進剿不許戊申命倉場侍郎張師載往江南隨高斌學習河務己酉上還京師九月壬子朔調鄂昌爲四川巡撫命策楞高斌會鞠周學健戊午賜塞楞額自裁己未召北路參贊大臣塔爾瑪善努三來京以穆克登額薩布哈善代之訥親等奏克申札申達諸城調策楞爲兩江總督尹繼善爲兩廣總督辛酉召訥親張廣泗來京命傅爾丹護四川總督與岳鍾琪相機進討甲子起董邦達在內廷行走命尙書班第赴軍營同傅爾丹岳鍾琪辦理軍務命軍營內大臣以下聽傅爾丹節制

丁卯召黃廷桂來京以瑚寶署甘肅巡撫兼辦陝甘總督事己巳上幸靜宜園閱兵壬申簡親王神保住以凌虐兄女奪爵癸酉命德沛襲簡親王丁丑諭責訥親張廣泗老師糜餉飭訥親繳經略印己卯命傅恒暫管川陝總督事赴軍營命侍郎舒赫德軍機處行走庚辰訥親張廣泗以貽誤軍機褫職逮問召張廣泗來京發訥親北路軍營効力以傅恒爲經略統金川軍務辛巳命來保暫管戶部冬十月壬午朔調滿洲兵五千名赴金川軍營諸王大臣請治訥親罪諭責訥親負國負恩候回奏再行降旨乙酉召尹繼善來京以碩色爲兩廣總督鄂容安署河南巡撫賑湖南新甯縣水災丙戌班第以不効訥親罪降調以舒赫德爲兵部尙書丁亥命傅恒爲保和殿大學士兼管戶部戊子移孝賢皇后梓宮於靜安莊上如靜安莊奠酒乙丑賑山東鄒平等三十州縣衛水災以尹繼善爲戶部尙書辛卯上幸豐澤園賜經略傅恒並從征將士宴岳鍾琪奏克跟維之捷壬辰調開泰爲湖南巡撫以唐綏祖爲江西巡撫甲午賑山西陽曲等十五州縣旱災戊戌上幸寶誥寺閱八旗演習雲梯兵丁未賑安徽阜陽

等州縣衛災已酉命尹繼善協辦大學士壬子幸重華宮賜經略傅恒宴癸丑上詣堂子行祭告禮及祭吉爾丹蘇甲寅賑江蘇銅山縣湖北漢川等八州縣衛水災丙辰命各省巡撫皆兼右副都御史銜丁巳上幸南苑行圍戊午上閱兵戊辰賜周學健自裁平郡王福彭卒輟朝二日己巳命尹繼善在軍機處行走賑福建晉江等十四縣旱潮等災庚午免直隸文安等三縣水災地租癸酉上幸豐澤園賜東三省兵隊宴并賞賚有差以策楞爲川陝總督雅爾哈善署兩江總督以傅恒日馳二百餘里嘉勞之甲戌給尹繼善欽差大臣關防署川陝總督丁丑以訥親請命張廣泗岳鍾琪分路進兵責以前後矛盾逮治之己卯以用兵金川勞費密諭傅恒息事甯人庚辰分設四川陝甘總督以尹繼善爲陝甘總督策楞爲四川總督管巡撫事鄂昌爲甘肅巡撫調舒赫德爲戶部尙書瑚寶爲兵部尙書十二月甲申定內閣大學士滿漢各二員協辦大學士滿漢一員或二員改所兼四殿二閣爲三殿三閣乙酉加傅恒太保命阿克敦協辦大學士丁亥以黃廷桂爲兩江總督上御瀛臺親鞫張廣泗戊子遣舒赫

德逮訥親赴軍營會傅恒嚴鞠之以海望署戶部尙書哈達哈署兵部尙書步軍統領辛卯慶復李質粹論斬大學士陳世倌罷壬辰張廣泗處斬丙寅密諭傅恒明年三月不能奏功應受降徹兵丁酉命川陝督撫皆聽傅恒節制班第專辦巡撫事務兆惠專辦糧運免高斌大學士仍留南河總督任癸卯命傅恒等說明訥親以其祖遇必隆刀於軍前斬之甲辰賑陝西耀州等二十五州縣旱災

十四年春正月辛亥諭傅恒岳鍾琪由黨壩進勦傅爾丹辦理卡撤一路癸丑以大學士張廷玉年老命五日一進內備顧問諭傅恒以四月爲期納降班師乙卯賑山東金鄉等州縣災丁巳命傅爾丹達勒黨阿舒赫德尹繼善策楞參贊大金川軍務戊午命瑚寶署陝甘總督侍郎班第視職仍署四川巡撫甲子召傅恒還京命尙書達勒黨阿舒赫德尹繼善均回任策楞岳鍾琪辦理大金川軍務丙寅以傅爾丹請深入嚴飭之丁卯以大金川莎羅奔耶卡乞降命傅恒班師特封忠勇公丙子諭傅恒受莎羅奔等降丁丑南掌國王烏孫進牙象

二月乙酉唐綏祖請率屬捐廩助餉上以不知政體嚴飭之內戊加來保太子太傅陳大受舒赫德策楞尹繼善太子太保汪由敦梁詩正太子太師達勒黨阿納延泰阿克敦哈達哈太子少師壬辰傅恒奏於二月初五日設壇除道宣詔受大金川土司莎羅奔土舍郎卡降賜傅恒四團龍補服加賜豹尾槍二親軍二岳鍾琪加太子少保癸巳以岳鍾琪親至勒烏圍招莎羅奔等來降諭特嘉之內申召拉布敦衆佛保來京庚子命舒赫德查閱雲南等省營伍會同新柱勘金沙江工程以瑚寶署湖廣總督乙巳上幸豐澤園演耕莎羅奔進番童番女各十人詔却之三月癸丑命皇長子及裕親王等郊迎傅恒乙卯上奉皇太后至靜安莊孝賢皇后梓宮前臨奠丁巳上率經略大學士公傅恒詣皇太后宮問安封岳鍾琪爲三等公加兵部尙書銜己未命傅恒兼管理藩院來保兼管兵部命那木札勒德保仍爲總管內務府大臣辛酉上詣東陵甲子上謁昭西陵孝陵孝東陵景陵丁卯上至南苑行圍癸酉上謁泰陵甲戌賑湖北漢川等六州縣水災乙亥免直隸保安等十州縣旱災額賦丁丑裁直隸河道

總督兼理加入關防敕書富森改西安將軍以傅爾丹爲黑龍江將軍四月壬午上御太和殿奉皇太后命冊封嫺貴妃那拉氏爲皇貴妃攝六宮事甲申改來保兼管刑部召蘊著來京以顧琮署漕運總督命納延泰等勘察哈爾災乙酉加上皇太后徽號曰崇慶慈宣康惠皇太后次日頒詔覃恩有差辛卯免山東鄒平等二十州縣水災甘肅皋蘭等十二廳州縣雹災額賦召彭樹葵來京調唐綏祖爲湖北巡撫以阿思哈爲江西巡撫命倉場侍郎張師載以原銜協辦江南河務戊戌以瑚寶爲漕運總督命唐綏祖署湖廣總督調哈達哈爲兵部尙書以三和爲工部尙書免山東王家岡等四場額賦己亥命江西巡撫兼提督銜庚子召納敏來京以衛哲治爲安徽巡撫乙巳賑福建臺灣等三縣災免湖南新寧上年水災額賦五月乙卯免甘肅皋蘭等十三廳州縣旱災額賦丙辰免安徽阜陽等十三州縣銜上年旱災額賦辛酉上至黑龍潭祈雨六月丙申賑甘肅渭源等州縣旱災己亥廣西學政胡中藻以裁缺怨望命來京候補仍下部嚴議秋七月戊申賑福建光澤等二縣水災庚戌免湖北漢川等六

州縣上年水災額賦辛亥直隸總督那蘇圖卒免湖北晉江等九縣潮災額賦壬子以方觀承爲直隸總督陳大受署之永貴署山東巡撫命來保兼管吏戶二部阿克敦兼署步軍統領庚申上奉皇太后駐避暑山莊辛酉命傅恆陳大受譯西洋等國番書丁卯上奉皇太后木蘭行圍乙亥補蜀山西永濟等六州縣被災額賦八月庚辰上行圍巴顏溝蒙古諸王等進筵宴壬午賑湖北羅田等二縣水災癸卯賑河南延津等七縣水災甲辰賑湖北潛江等十三州縣水災九月乙卯上奉皇太后回蹕乙丑授鄂容安河南巡撫內寅瞻對番目班滾降賜慶復自裁冬十月甲午賑浙江錢塘等二十二州縣廳鮑郎等十八場水災賞傅清都統銜同紀山駐藏掌欽差大臣關防丁酉召八十五來京以卓鼎爲歸化城都統戊戌飭四川嚴緝咽喉匪以珠爾默特那木札爾縱恣諭策楞岳鍾琪傳清紀山防之喀爾喀台吉額林沁之子旺布多爾濟獲額魯特逃人上嘉賚之免江蘇阜甯等二十三州縣漕糧有差己亥免直隸薊州等十八州縣廳水災額賦並賑之甲辰召原任左副都御史孫嘉淦來京十一月丁未命梁

詩正兼管吏部尙書癸亥命刑部尙書汪由敦署協辦大學士戊辰大學士張廷玉乞休允之庚辰以劉統勳爲工部尙書辛巳起彭維新爲左都御史癸未賜張廷玉詩申配饗之命丁亥汪由敦以漏洩諭旨免協辦大學士留尙書任以梁詩正協辦大學士辛卯削致仕大學士張廷玉宣勤伯爵以大學士原銜休致仍准配享太廟調哈達哈爲工部尙書舒赫德爲兵部尙書海望爲戶部尙書以木和蘭爲禮部尙書新柱爲吉林將軍永興爲湖廣總督乙未召衛哲治來京調圖爾炳阿爲安徽巡撫岳溶爲雲南巡撫以蘇昌爲廣東巡撫

十五年春正月丙午免直隸山西河南浙江未完耗羨免江蘇安徽山東耗羨十分之六丁未命張允隨爲東閣大學士碩色爲雲貴總督陳大受爲兩廣總督梁詩正爲吏部尙書李元亮爲兵部尙書甲寅上幸瀛臺紫光閣賜準噶爾使尼瑪宴乙卯召紀山回京命拉布敦同傅清駐藏辦事壬戌命工部侍郎劉綸在軍機處行走李質粹處斬王世泰羅于朝論斬二月乙亥上奉皇太后西巡五臺免經過地方額賦三分之一庚辰丁丑朝鮮入貢丙戌上奉皇太后駐

蹕五臺山菩薩頂己丑定邊左副將軍喀爾喀超勇親王策凌卒命貝勒羅布藏署定邊左副將軍丁酉再免山西蒲縣等二縣上年被災額賦十分之三戊戌上駐趙北口行圍辛丑探訪經學遺書癸卯上閱永定河隄工三月丙午加張允隨太子太保蔣溥方觀承黃廷桂太子少保再免直隸薊州等十七州縣額賦十分之三己酉上奉皇太后還京師甲寅孝賢皇后二周年上詣靜安莊致奠乙卯致仕大學士張廷玉回籍優賚有加令散秩大臣領侍衛十員護送之戊午免安徽貴池等三十州縣十四年水災額賦並賑之乙丑免湖北潛江等四州縣十四年水災額賦庚午免山東鄒平等二十七州縣衛十四年水災額賦夏四月丙子雲南省城火藥局災壬辰起阿桂在吏部員外郎上行走乙未能致仕大學士張廷玉配享免安徽貴池等三十州縣衛十四年水災額賦戊戌召拉布敦來京命班第駐西藏紀山駐青海五月庚戌上詣黑龍潭祈雨辛亥命刑部清理庶獄減徒杖以下罪直隸亦如之癸丑諭九卿科道直隸闕失甲寅召新柱來京以卓鼎爲吉林將軍衆佛保爲歸化城都統庚午上詣黑

龍潭祈雨六月丙子以喀爾喀親王成衮札布爲定邊左副將軍丙申賑直隸樂亭水災以保德爲北路軍營參贊大臣秋七月丙午廣東巡撫岳濬禔職命圖爾炳阿銜哲治仍留雲南安徽巡撫任己酉命劉統勳赴廣東查折米收倉積弊庚申汪由敦降兵部侍郎以劉統勳爲兵部尙書孫嘉淦爲工部尙書乙丑緬甸入貢八月壬申上御太和殿奉皇太后懿旨冊立皇貴妃那拉氏爲皇后癸酉以冊立皇后上率王大臣奉皇太后御慈寧宮行慶賀禮加上皇太后徽號曰崇慶慈宣康惠敦和皇太后丁亥上奉皇太后率皇后謁陵並巡幸嵩洛戊子命紀山赴西甯辦事班第赴藏辦事代拉布敦回京庚寅上奉皇太后謁昭西陵孝陵孝東陵景陵甲午左都御史德通彭維新左副都御史馬靈阿以賂徇傳恒議處降革有差丁酉賑山東嶧縣等七州縣水災九月庚子朔以梅穀成爲左都御史壬寅上奉皇太后率皇后謁泰陵癸卯御史索祿等以劾將炳矯飾論斥其有心亂政褫職丙午吏部奏原任大學士張廷玉黨援門生又與朱荃聯姻應革職治罪上特免之己酉上駐正定府閱兵辛亥以拉布敦

爲左都御史丙辰免河南經過地方額賦十分之三丁巳上駐蹕彰德府幸精忠廟辛酉上駐蹕百泉奉皇太后辛白露園準噶爾台吉策旺多爾濟那木札勒爲部人所弑立其兄喇嘛達爾札癸卯再免河南歉收地方額賦十分之五乙丑賑福建閩縣等九縣水災己巳免河南祥符等縣明年額賦雲南河陽地震冬十月辛未幸嵩山丙子上奉皇太后駐蹕開封府戊寅上幸古吹臺加鄂容安爲內大臣賑浙江酒安水災甲申調愛必達爲雲南巡撫開泰爲貴州巡撫以楊錫紱爲湖南巡撫乙酉免江蘇清河等九州縣水災額賦戊子免山西應州等三州縣水災額賦甲午免順直固安等四十六廳州縣水雹各災額賦仍賑貸有差戊戌賑江蘇溧陽等州縣水災十一月辛丑上奉皇太后率皇后還京師己酉賑甘肅平涼二十八廳州雹旱災壬子免山東蘭山等縣旱災額賦並賑之癸丑珠爾默特那木扎勒謀作亂駐藏都統傅清左都御史拉布敦誘誅之其黨卓呢羅卜藏扎什等率衆叛傅清拉布敦遇害甲寅命策楞岳鍾琪率兵赴藏調尹繼善赴四川經理糧餉命侍郎那木扎勒同班第駐藏述紀

山來京命舒明駐青海衆佛保署之乙卯宣諭珠爾默特那木扎勒戕其兄車布登及悖逆諸狀追贈傅清拉布敦爲一等伯封傅清子明仁拉布敦子根敦爲一等子世襲命侍郎兆惠赴藏同策楞辦善後事宜丙辰命舒赫德仍在軍機處行走調穆和蘭爲左都御史以伍齡安爲禮部尙書召雅爾哈善來京以王師爲江蘇巡撫丁巳命策楞擇藏番日與班第協辦噶布倫事務乙丑以阿里衮爲湖廣總督調阿思哈爲山西巡撫衛哲治爲廣西巡撫以定長爲安徽巡撫戊辰以捕獲卓呢羅布臧扎什等亂已定止岳鍾琪進藏命駐打箭鎗十二月庚午朔賑盛京高麗堡等六站水災壬申始命漢大臣梁詩正等恩廕分部學習戊寅賑兩淮茺濱等三場水災庚辰命舒赫德勘浙江海塘壬午烏里雅蘇台參贊大臣薩布哈沙褫職以資德代之戊子賑盛京遼陽等七城承德等六州縣水災並蠲緩額賦有差癸巳唐綏祖被劾免以嚴瑞龍護湖北巡撫十六年春正月庚子以初次南巡免江蘇安徽元年至十三年通賦浙江本年額賦減直省緩決三次以上人犯罪以上年巡幸嵩洛免河南十四年以前逋

賦辛丑賑安徽宿州等州縣上年水災癸卯以江蘇逋賦積至二百二十餘萬諭釐革催徵積弊丙午免甘肅元年至十年逋賦以嚴瑞龍署湖北巡撫辛亥上奉皇太后南巡癸丑免經過直隸山東地方本年額賦十分之三自是南巡皆如之壬戌卓呢羅布藏札什等伏誅癸亥賑安徽歙縣等十五州縣旱災甲子免山東鄒平等縣逋賦及倉穀二月辛未賑山東蘭山等七州縣旱災癸酉免兩淮鹽戶逋賦乙亥命喀爾喀親王德沁扎布爲喀爾喀副將軍公車布登扎布爲參贊大臣丙子上奉皇太后渡河閱天妃閣丁丑閱高家堰辛巳免山東嶧縣等七州縣水災額賦有差乙酉上幸焦山丙戌調定長爲廣西巡撫己丑上駐蹕蘇州諭三吳士庶各敦本業力屏浮華辛卯宣布珠爾默特那木札勒叛逆罪狀懲辦如律嚴瑞龍褫職命阿里袞兼湖北巡撫壬辰免江蘇武進等縣新舊田租免興化縣元年至八年逋賦癸巳準噶爾使額爾欽等覲於蘇州行宮三月戊戌朔上奉皇太后幸杭州府貸黑龍江呼蘭地方水災旗民免官莊本年額賦免浙江淳安縣水災本年漕糧己亥以張師載爲安徽巡撫庚

子土幸敷文書院幸觀潮樓閱兵甲辰裁杭州漢軍副都統乙巳上祭禹陵丙午上奉皇太后還駐杭州府丁未閱兵戊申命高斌仍以大學士銜管河道總督事庚戌諭浙江士庶崇實敦讓子弟力田命班第掌駐藏欽差大臣關防辛亥東閣大學士張允隨卒癸丑上奉皇太后駐蹕蘇州府甲寅賑廣東海康等縣水災乙卯幸宋臣范仲淹祠賜園名曰高義賞後裔范宏興等貂幣辛酉上奉皇太后幸江甯府壬戌上祭明太祖陵乙丑賜紀山自裁丁卯起陳世倌爲文淵閣大學士免江蘇江浦等十五州縣被災額賦有差夏四月辛未吉林將軍卓鼎改杭州將軍以永興代之免甘肅皋蘭等九廳州縣十三年被災額賦癸酉上閱將家壩免江南沛縣九年以前通賦甲戌賑浙江永嘉等十州縣賑衡水災賑廣東龍川等十二州縣十五年水災丙子賑江蘇山陽等二十四州縣衛十五年水災己卯免甘肅狄道等二十廳州縣十四年被水旱雹霜災額賦有差以恒文爲湖北巡撫癸未免河南鄆陵等十六州縣十四年水災額賦乙酉永興褫職逮問吉林將軍卓鼎降調以傅森代之丙戌上駐蹕泰安府祀

東嶽戊子詔以五月朔日食行在徹懸齋戒己丑遣叔親王允禩代行常雲禮
五月丁酉朔日食丁未上臨奠都統傅清左都御史拉布敦戊申以永興等誣
劾唐綏祖給還籍產召來京辛亥賜吳鴻等二百四十三人進士及第出身有
差丁巳免廣東海康等十一州縣十五年風災額賦己未嚴瑞龍以誣告唐綏
祖論斬癸亥賑山東掖縣等六州縣潮災閏五月戊寅調黃廷桂爲陝甘總督
尹繼善爲兩江總督戊子以永貴爲浙江巡撫壬辰命保舉經學之陳祖范吳
鼎梁錫璵顧棟高進呈著述願赴部引見者聽癸巳直隸河間等州縣蝗是月
免山西太原等十九州縣上年水雹等災額賦有差賑山東壽光等六縣官蠶
等三場福建寧化等二縣水災雲南劍川等七州縣地震災六月己亥起唐綏
祖爲山西按察使壬子賑江蘇靖江縣雹災賑廣東英德等四州縣水災賑山
西鳳臺高平水災甲寅免江蘇沛縣上年水災額賦丙辰免浙江永嘉等七廳
州衛上年旱災額賦賑福建寧化等縣水災庚申緬甸入貢辛酉免安徽壽州
等二十五州縣水災額賦甲子準噶爾部人布圖遜林特古斯來降秋七月庚

午賑福建歸化等縣水災壬申上奉皇太后秋獵木蘭戊寅上奉皇太后駐蹕避暑山莊己卯河南陽武十三堡河決庚辰上奉皇太后巡幸木蘭行圍乙卯免山西清水河廳雹災額賦丙戌賑陝西朝邑縣水災己丑賑山東平度等州縣水災壬辰賑山西鳳臺等九縣水災八月乙未賑浙江海甯等六十五州縣衛所及大嵩等場旱災賑江西上饒等七縣被旱災賑湖北天門旱災丙申賜陳祖范顧棟高國子監司業銜戊戌以碩色舉發僞撰孫嘉淦奏稿假造硃批諭方觀承等密緝之己酉上奉皇太后回駐避暑山莊辛亥命修房山縣金太祖陵世宗陵丁巳上奉皇太后還京師己未賑河南商邱等十四縣水災庚寅準奏以徇隱僞奏褫職逮問調鄂容安爲山東巡撫舒輅爲河南巡撫鄂昌爲江西巡撫以楊應琚爲甘肅巡撫命高斌赴河南辦陽武河工辛酉以莊有恭爲江蘇巡撫癸亥免甘肅平涼等五州縣雹災額賦乙丑定明年二月各省舉行恩科鄉試詔停本年秋決癸酉賑山東鄒平等五十三州縣水災丙子上奉皇太后詣泰陵丁丑賑福建福安等二縣水災庚辰上奉皇太后謁泰陵是日

回蹕甲申命舒赫德赴江南查辦偽撰孫嘉淦奏稿事庚寅命陳世倌兼管禮部兩廣總督陳大受卒調阿里衮代以永常爲湖廣總督辛卯賑河南上蔡等州縣水災癸巳賑福建霞浦等四縣潮災冬十月戊戌以范時綬署湖南巡撫壬寅賑長蘆屬富國等七場山東王家岡等三場水災甲寅賑安徽歙縣等十八州衛旱災丙辰賑江蘇銅山等八州縣水災調陳宏謀爲河南巡撫舒輅爲陝西巡撫賑山東齊東等七州縣本年水災榮成縣雹災戊午賑直隸武清等二十六州縣水雹災癸亥免山東官臺二場隨潮災十一月甲戌賑河南祥符等五縣水災乙亥賑直隸東明等三州縣本年水災庚辰陽武決口合龍乙酉以皇太后六旬萬壽上徽號曰崇慶慈宣康惠敦和裕壽皇太后頒詔覃恩有差丙戌命高斌汪由敦會勘天津河工戊子皇太后聖壽節上奉皇太后御慈寧宮率王公大臣行慶賀禮十二月癸巳朔以烏爾登爲北路軍營參贊大臣丁酉濬永定河引河戊戌賑吉林琿春地方本年水災庚子賑山東鄒平等五十五州縣水災壬寅以雅爾哈善爲浙江巡撫甲辰濬直隸南北兩運減河命

多爾濟代班第駐藏辦事辛亥賑浙江鄞縣等六十州縣廳衛所大嵩等八場旱蟲災

十七年春正月乙亥賜準噶爾使圖卜濟爾哈朗等宴庚戌設盛京總管內務府大臣以將軍兼管甲申以準噶爾達瓦齊阿睦爾撒納內訌增兵阿爾泰邊陲命舒赫德玉保查閱北路軍營內戌以阿巴齊達清阿爲北路參贊大臣丁亥賑江蘇銅山等六州縣安徽歙縣等九州縣被災貧民辛卯修直隸永定河下口及鳳隄二月乙未以鍾音爲陝西巡撫己亥釋準泰甲寅上詣東陵丙辰布魯克巴之額爾德尼第巴貢方物丁巳上謁昭西陵孝陵孝東陵景陵戊午上駐蹕盤山己未賑山西山陰虞鄉被災貧民辛酉修房山縣金太祖世宗陵三月戊辰以浙東災重諭雅爾哈善加賑毋令流移庚午上還宮壬申以莫爾歡爲歸化城都統戊寅福建巡撫潘恩桀卒調陳宏謀爲福建巡撫以蔣炳爲河南巡撫夏四月甲午免山東齊東等十二州縣衛上年水災額賦乙巳免直隸武清等二十三廳州縣上年水災額賦庚戌免浙江海寧等七十三州縣衛

及大嵩等十三場上年水災額賦丁巳免直隸永利等四場山西山陰等縣上年水災額賦五月辛未直隸東光武清等四十三州縣蝗庚辰賑河南祥符等十四縣水災己丑賑甘肅狄道等十四州縣上年水災山東濟南等八府蝗江南上元等十二州縣生蝻六月甲午準噶爾部人呢雅斯來降丁未御試翰林詹事等官擢汪廷瓊等三員爲一等餘陞黜有差試滿洲由部院改入翰林詹事等官擢德爾泰爲一等餘降用有差丙辰以鄂樂舜爲甘肅巡撫秋七月丁丑上奉皇太后秋獵木蘭己卯免所過州縣錢糧十分之三癸未上奉皇太后駐避暑山莊丁亥賑江蘇銅山等縣水災八月丙申順天鄉試內簾御史蔡時田舉人曹詠祖坐交通關節處斬壬寅撫賑福建晉江等廳縣風災甲辰上奉皇太后巡幸木蘭行圍丙午命黃廷桂查辦陝西賑恤乙卯賑陝西咸寧等二十一州縣旱災九月辛酉西洋波爾都噶爾亞國遣使入貢四川雜谷土司蒼旺作亂命岳鍾琪率兵勦之庚午蘇祿番目所齎入貢國書不合飭喀爾吉善等遣回國甲戌四川官軍克雜谷臘降番寨一百有六予策楞岳鍾琪優叙戊

寅減甘肅張掖等五縣偏重額賦賑河南被災飢民己卯上奉皇太后還京師
庚辰協辦大學士吏部尙書梁詩正請終養許之以孫嘉淦爲吏部尙書協辦
大學士汪由敦爲工部尙書辛巳準噶爾喇嘛根敦林沁等來降丁亥召尹繼
善來京以莊有恭署兩江總督蒼旺伏誅冬十月戊子朔賜秦大士等一百四
十一人進士及第出身有差召鄂昌來京以鄂容安署江西巡撫楊應琬署山
東巡撫壬寅阿思哈奏平陽紳民捐賑災銀諭不忍令災地富民出貲飭還之
調定長爲山西巡撫以李錫泰爲廣西巡撫己酉上詣東陵並送孝賢皇后安
地宮壬子上謁昭西陵孝陵孝東陵景陵丁巳賑江蘇上元等十九州縣山西
臨晉等十州縣湖北鍾祥等二十五州縣衛旱災四川雜谷黑水後番上下寨
來降十一月庚申上還京師甲子命刑部尙書劉統勳在軍機處行走戊辰賑
山西聞喜等五州縣旱災庚辰以鄂容安爲江西巡撫十二月戊子賑甘肅皋
蘭二十一廳州縣水災迺災己丑修陝西永壽等九縣城以工代賑賑河南武
陟縣水災黑龍江將軍富爾丹卒以綽爾多代之乙巳御史書成請釋傳鈔僞

奏稿人犯忤旨褫職諭陳宏謀毋究捕天主教民

十八年春正月戊午賑陝西耀州等三十七州縣山西永濟等十一州縣旱災
丙寅廣東東莞縣匪莫信豐等福建平和縣匪蔡榮祖等作亂捕治之戊寅調
黃廷桂署四川總督尹繼善署陝甘總督以鄂容安兼署兩江總督班第署兩
廣總督辛巳鄂昌等褫職逮問乙酉免山東章邱等三十一州縣衛積年逋賦
二月丁亥朔以岳鍾琪請用兵郭羅克諭黃廷桂議奏丙申上謁泰陵丁酉上
祭金太祖世宗陵江南千總盧魯生坐僞撰孫嘉淦奏稿磔於市己亥皇太后
自暢春園啟蹕至涿州上詣行宮請安壬寅上奉皇太后御舟至蓮花淀閱水
圍丙午免河南夏邑等五縣十六年被水額賦丁未命兆惠赴藏辦事戊申上
閱永定河工庚戌上幸南苑行圍辛亥免江蘇上元等十州縣十七年水災額
賦三月癸亥以雅爾哈善于查辦僞奏稿不加詳鞫下部嚴議戊寅賑安徽壽
州等十一州縣衛上年旱災飢民己卯以開泰署湖廣總督定常署貴州巡撫
辛巳賑湖北十九州縣衛上年旱災夏四月丁亥錢陳羣諫查辦僞奏稿上斥

以沽名並飭勿存稿以爾子孫將不保首領諭之己丑西洋博爾都噶里雅遣使貢方物優詔答之以恒文署湖廣總督甲午賜西洋博爾噶都里雅貢使宴乙未免雲南劍川州十六七年地震水災額賦有差並賑恤之辛丑賜西洋博爾都噶里雅國王敕加賚文綺珍物丙午以旱命刑部清理庶獄減徒以下罪直隸亦如之丁未上詣黑龍潭祈雨壬子命永常努三往安西給欵差大臣關防五月癸亥減秋審朝審緩決三次以上罪丁卯山東濟寧汶上等州縣蝻免廣東豐順等三縣上年水災額賦辛未免浙江仁和等六縣仁和場上年水災額賦並賑恤之辛未準噶爾台吉喇嘛達爾札與達瓦齊相攻被執達瓦齊自爲台吉六月癸巳以策楞署兵部尙書乙未浙江上虞人丁文彬以衍聖公孔昭煥發其造作逆書鞠實磔之丙申天津等州縣蝗秋七月甲子順天宛平等三十二州縣衛蝗壬申江南邵伯湖減水二閘及高郵車邏壩同時並決命策楞劉統勳會同高斌查辦水災賑安徽歙太湖等縣水災庚辰命莊有恭賑高郵寶應水災壬午停各省分巡道兼布政使司參政參議按察使司副使僉事

等銜及陞用鴻臚寺少卿八月戊子命履親王允禩代祭大社大稷賑兩淮板浦等場水災戊戌上奉皇太后秋獵木蘭庚子高斌免以策楞署南河河道總督同劉統勳查辦河工侵虧諸弊辛丑命永常開泰各回本任甲辰上奉皇太后駐蹕避暑山莊乙巳撥江西湖北米各十萬石賑江南災丁未上奉皇太后巡幸木蘭行圍庚戌高斌張師載褫職留河工効力以衛哲治爲安徽巡撫辛亥賑江蘇銅山十二州縣水災山東蘭山等縣水災九月庚申賑湖北潛江等三縣水災壬戌河南陽武十三堡河決丁卯以扈從行圍畏蒞不前褫豐安公爵田國恩侯爵阿里袞領侍衛內大臣以弘昇爲正白旗領侍衛內大臣庚午以皇后至盤山命舒赫德爲領侍衛內大臣管理內務府大臣隨往江蘇銅山河決壬申命舒赫德協辦江南河工以阿里袞署領侍衛內大臣隨扈盤山以尹繼善爲江南河道總督鄂容安爲兩江總督調永常爲陝甘總督開泰爲湖廣總督黃廷桂爲四川總督以定常爲貴州巡撫胡寶瑔爲山西巡撫范時綬爲江西巡撫楊錫紱爲湖南巡撫召班第來京以策楞爲兩廣總督癸酉上

奉皇太后駐避暑山莊甲戌左都御史梅穀成休致丙子諭將貽誤河工之同知李煒守備張寶斬於銅山工次命策楞等縛高斌張師載令目賭行刑訖釋放丁丑賑山東利津等縣水災冬十月庚寅蘇祿國王遣使勞獨萬查刺請內附下部議辛卯召劉統勳來京乙未賑山東海豐等六縣本年潮災命鍾音署陝甘總督辛丑以楊錫紱爲左都御史調胡寶琮爲湖南巡撫恒文爲山西巡撫以張若震爲湖北巡撫癸卯免江蘇阜甯等二十六州縣衛新舊額賦有差乙巳賑安徽太湖等三十州縣衛水災庚戌免浙江錢塘等二十八州縣廳衛所旱災額賦有差十一月己未召蘇昌來京以鶴年爲廣東巡撫癸亥江西生員劉震宇以所著治平新策有更易衣服制度等語處斬甲子賑甘肅皋蘭等二十九州縣衛所水雹災並免額賦有差甲戌以楊應琚爲山東巡撫準噶爾杜爾伯特台吉車凌烏巴什等率所部來降丙子賑浙江玉環廳旱災庚辰安徽池州府知府王岱因虧空褫職潛逃拒捕處斬十二月丙戌賑兩淮富安等場旱災命歸降杜爾伯特台吉車凌等移居呼倫貝爾丁亥協辦大學士吏部

尙書孫嘉淦卒命王保努三薩喇勒爲北路參贊大臣命舒赫德赴鄂爾坤軍營庚寅命戶部尙書蔣溥協辦大學士以黃廷桂爲吏部尙書仍管四川總督鄂彌達署之內申江南張家馬路及邵伯湖二閘決口同日合龍庚子以準噶爾台吉達瓦齊未遣使來京諭永常暫停貿易

十九年春正月壬子賑安徽宿州等十五州縣衛江蘇阜甯等十五州縣衛上年水災壬戌命薩喇勒等討入卡之準噶爾烏梁海乙亥命楊錫紱署吏部尙書罷鄂彌達兼管丁丑琉球入貢己卯準噶爾台吉車凌等入覲二月丙申賑山東蘭山十八年水災戊戌蘇祿入貢命廣東督撫檄國王毋以內地商人充使賑山東昌邑等四縣永豐等五場潮災癸卯召策楞來京乙巳準噶爾烏梁海庫木來降己酉命策楞赴北路軍營三月辛亥朔以白鍾山爲河東河道總督楊應琚署之準噶爾台吉阿睦爾撒納等與達瓦齊內鬩戊午命舒赫德成袞札布薩喇勒來京喀爾喀親王額琳沁多爾濟管理喀爾喀兵事庚申四川提督岳鍾琪卒賑湖北潛江等四州縣衛水災並蠲賦有差癸亥免直隸大城

等十廳州縣十八年水雹旱災額賦庚午免安徽太平等二十五州縣衛十八年水災額賦並賑之乙亥賑兩淮富安等十二場隨戶夏四月庚辰朔加劉統勳汪由敦太子太傅方觀承喀爾吉善黃廷桂太子太保鄂容安開泰太子少傅永常領色太子少保命準噶爾台吉車凌等入覲庚寅成袞札布降喀爾喀副將軍以策楞爲定邊左副將軍辛卯召班第回京以楊應琬署兩廣總督丙午命都統德寧準噶爾台吉色布騰爲北路軍營參贊大臣是月免長蘆滄州等二場上年旱災隨戶直隸滄州等二州上年水災隨戶額賦賑甘肅皋蘭等十五州縣上年旱災賑安徽宿州等十二縣州江蘇阜寧等二十三州縣上年水災閏四月庚戌朔賜莊培因等二百三十三人進士及第出身有差己未免湖北潛江等四州縣衛上年水災額賦辛未色布騰入覲命大學士傅恒至張家口傳旨迎勞封貝勒壬申京師雨五月辛巳命清保爲黑龍江將軍以準噶爾內亂諭兩路進兵取伊犁召永常策楞來京面授機宜甲申上奉皇太后巡幸盛京戊子免安徽太平等二十五州縣衛上年水災額賦庚寅上奉皇太后

駐蹕避暑山莊封準噶爾台吉車凌爲親王車凌烏巴什爲郡王車凌孟克爲貝勒孟克特穆爾拜音根敦爲貝子癸巳免浙江廟灣等十一場十八年被水竈戶額賦災重者賑之丁酉免長蘆屬永阜等三場上年水災竈戶額賦戊戌召陳宏謀來京命劉統勳協同永常辦理陝甘總督事務調陳宏謀爲陝西巡撫鍾音爲福建巡撫己亥召雅爾哈善來京調鄂樂舜爲浙江巡撫以鄂昌爲甘肅巡撫六月壬子賑福建龍溪等州縣水災庚申賑甘肅皋蘭等五州縣旱災壬戌阿睦爾撒納等爲達瓦齊所敗奔額爾齊斯夔博和碩之地諭策楞等接應歸附壬申命雅爾哈善署戶部侍郎在軍機處行走秋七月辛巳賑直隸薊州等州縣水災壬午上奉皇太后詣盛京癸未命護軍統領塔勒瑪善副都統扎勒杭阿爲北路軍營參贊大臣丙戌以烏梁海人巴朗逃降車布登爲貝子參贊大臣安崇阿德審諭斬丁酉阿睦爾撒納率部衆來降命薩喇勒迎勞己亥上駐蹕彰武臺河東大營奉皇太后御行幄庚子以喀爾喀台吉丹巴札布失機命處斬召策楞舒赫德色布騰薩喇勒來京以額琳沁多爾濟署將軍

兆惠爲參贊大臣壬寅命阿睦爾撒納入覲丙午以班第爲兵部尙書署定邊左副將軍以阿里衮爲步軍統領賑江蘇興化等州縣水災八月辛亥授楊應琚兩廣總督癸丑命達勒黨阿爲黑龍江將軍甲寅上駐蹕吉林乙卯上詣溫德亨山望祭長白山松花江丁巳召鄂容安赴行在以尹繼善署兩江總督己未賑齊齊哈爾等三城水災庚申賑甘肅皋蘭等五州縣旱災丙寅上閱輝發城丁卯命阿睦爾撒納游牧移鄂爾坤塔密爾癸酉以策凌孟克及策凌烏巴什訥默庫爲西路參贊大臣乙亥北路以達勒黨阿烏勒登努三兆惠爲參贊大臣西路以薩喇勒阿蘭泰玉保爲參贊大臣九月丁丑朔賑兩淮角斜等場鼃潮災辛巳上奉皇太后率皇后謁永陵薩喇勒等征烏梁海甲申免甘肅皋蘭等十五州縣被水被雹額賦丙戌謁昭陵福陵丁亥上奉皇太后駐蹕盛京戊午上率羣臣詣皇太后行慶賀禮御崇政殿受賀免奉天府所屬本年丁賦自山海關外及寧古塔等處已結未結死罪均減等軍流以下悉免之朝鮮國王李昫遣使詣盛京貢獻己丑停本年秋決辛卯上謁文廟癸巳上御大政殿

盛京宗室覺羅將軍等進御膳甲午上奉皇太后率皇后自盛京回蹕己亥減直隸武清等四縣額賦辛丑以班第爲定邊右副將軍鄂容安爲參贊大臣癸卯命車凌烏巴什訥默庫車凌孟克等赴西路在參贊大臣上行走喀爾喀王巴雅爾什第等在北路軍營領隊上行走冬十月癸丑賑山東惠民等十六州縣衛永和等三場水災甲寅調衛哲治爲廣西巡撫鄂樂舜爲安徽巡撫以周人驥爲浙江巡撫乙卯賑安徽壽州等十九州縣衛本年水災山西馬邑雹災丙辰上奉皇太后還宮戊午上御太和殿受王以下文武百官進表朝賀己未以工部尙書汪由敦管刑部尙書辛酉賑江蘇阜甯等十六州縣衛水災並蠲賦有差辛未移京城滿洲兵三千駐阿勒楚喀等處屯墾增副都統一協領一庚午以鄂彌達署吏部尙書十一月戊寅賑福建諸羅等二縣風災上幸南苑蘇祿國王蘇老丹嘛喊味麻安柔律隣遣使貢方物準噶爾克爾格特台吉阿布達什來降庚辰賑順天直隸武清等十五州縣被水被雹飢民並免額賦有差乙酉上幸避暑山莊丁亥輝特台吉阿睦爾撒納杜爾伯特台吉訥默庫等

率降衆於廣仁嶺迎駕是日上召見阿睦爾撒納等賜宴賞賚有差戊子封阿睦爾撒納爲親王訥默庫班珠爾爲郡王杜爾伯特台吉剛多爾濟巴圖博羅特輝特台吉札木參齊木庫爾爲貝勒杜爾伯特台吉布圖克森額爾德尼羅壘原端輝特台吉德濟特普爾普克什克爲貝子輝特台吉根敦札布等杜爾伯特布顏特古斯等爲公杜爾伯特台吉烏巴什等輝特台吉伊什等爲一等台吉以輝特親王阿睦爾撒納爲北路參贊大臣郡王訥默庫爲西路參贊大臣命額林沁多爾濟爲西路參贊大臣召班第來京命阿睦爾撒納署將軍額駙色布騰巴勒珠爾協辦命車凌同車凌烏巴什往西路軍營訥默庫同阿睦爾撒納班珠爾往北路軍營戊戌上還京師十二月戊申以班第爲定北將軍阿睦爾撒納爲定邊左副將軍永常爲定西將軍薩喇勒爲定邊右副將軍辛亥上幸大學士來保予告大學士福敏第視疾以親王固倫額駙色布騰巴勒珠爾親王銜額琳沁郡王訥默庫班珠爾郡王銜青滾雜卜尙書公達勒黨阿總督伯鄂容安護軍統領烏勒登爲北路參贊大臣親王額琳沁多爾濟車凌

郡王車凌烏巴什貝勒車凌孟克色布騰貝子扎拉豐阿公巴圖孟克瑪什巴圖將軍阿蘭泰爲西路參贊大臣癸亥安南國王黎維禪進方物賑甘肅河州等十五廳州縣衛水災內寅調鄂容安爲西路參贊大臣命阿蘭泰庫克新瑪木特爲北路參贊大臣

二十年春正月丁丑命定邊左副將軍阿睦爾撒納率參贊大臣額駙色布騰巴勒珠爾郡王品級青滾雜卜內大臣瑪木特奉天將軍阿蘭泰由北路進征定邊右副將軍薩喇勒率參贊大臣郡王班珠爾貝勒品級札拉豐阿內大臣鄂容安由西路進征癸未以阿里衮署刑部尙書癸卯免烏梁海札哈沁包沁等貢賦一年二月乙巳朔日食命兆惠留烏里雅蘇台協辦軍務在領隊大臣上行走丙午朝鮮貢方物乙卯上謁東陵戊午上謁昭西陵孝陵孝東陵景陵至孝賢皇后陵奠酒己未召范時綬來京調胡寶琮爲江西巡撫以楊錫紱署湖南巡撫將溥署吏部尙書賑山東惠民等十二州縣衛水災庚申準噶爾噶勒雜特部人齊倫來降丁卯賑雲南易門石屏地震災民己巳賑江蘇高郵等

州縣衛上年災民三月丙子永常等奏額魯特業克明安巴雅爾來降戊寅免江蘇江浦等二十二州縣衛十九年水災額賦己卯上詣秦陵召鄂昌來京調陳宏謀爲甘肅巡撫以台柱署陝西巡撫壬午上謁秦陵乙酉上駐蹕吳家莊閱永定河隄丙戌上幸涼鷹台行圍殄熊一虎二召大學士九卿翰詹科道諭胡中藻詩悖逆張泰開刊刻鄂昌唱和諸罪命嚴鞫定擬庚寅上還京師鄂昌褫職逮問壬辰高斌卒釋張師載回籍乙未扎哈沁得木齊巴哈曼集宰桑敦多克等來降庚子免直隸霸州等六州縣廳本年旱災額賦壬寅準噶爾台吉噶爾藏多爾濟等來降夏四月丙午額林哈畢爾噶宰桑阿巴噶斯等來降壬子致仕太保大學士張廷玉卒命遵世宗遺詔配饗太廟甲寅胡中藻處斬乙丑吐魯番伯克莽噶里克來降免長蘆永利等三場海豐一縣水災額賦丙寅免山東惠民等十六州縣水災額賦丁卯綽羅斯台吉衮布什卜等並葉爾羌等回部和卓木來降戊辰琉球國世子尙穆遣使入貢請封允之壬申集賽宰桑齊巴汗來降五月甲戌朔免安徽壽州等十九州縣衛水災額賦喀爾喀車

臣汗副將軍公格勒巴木丕勒禡爵留營効力以扎薩克郡王得木楚克代之
戊寅賑奉天承德等七州縣水災庚辰命翰林院侍講全魁編修周煌往琉球
册封辛巳和通額默根宰桑鄂哲特等來降壬午庫圖齊納爾宰桑薩賚來降
甲申準噶爾宰桑烏魯木來降戊子阿勒關沁鄂拓克宰桑塔爾巴來降己丑
達瓦齊遁特克斯庚寅史貽直原品休致賜鄂昌自盡辛卯命黃廷桂爲武英
殿大學士仍留四川總督任調王安國爲吏部尙書以楊錫紱爲禮部尙書何
國宗爲左都御史調陳宏謀爲湖南巡撫以吳達善爲甘肅巡撫圖爾炳阿爲
河南巡撫壬辰阿睦爾撒納奏克定伊犁賞阿睦爾撒納親王雙俸封其子爲
世子晉封班第薩喇勒爲一等公瑪木特爲三等公賞色布騰巴勒珠爾親王
雙俸封扎拉豐阿爲郡王車布登扎布普爾普爲貝勒賞車凌親王雙俸封車
凌烏巴什班珠爾訥默庫爲親王策楞孟克爲郡王再授傅恒一等公爵軍機
大臣等俱優叙有差賑江蘇清河銅山等州縣水災癸巳召達勒黨阿來京協
辦大學士以綽勒多署黑龍江將軍大學士傅恒辭公爵允之封班第爲誠勇

公薩喇勒爲超勇公瑪木特爲信勇公六月癸卯朔以平定準部告祭太廟遣
官告祭天地社稷先師孔子命四衛喇特如喀爾喀例每部落設盟長及副將
軍各一人丙午阿睦爾撒納奏兵至格登山大敗達瓦齊之兵封喀喇巴圖魯
阿玉錫巴圖濟爾察哈什等男爵並授散秩大臣餘賞賚有差已酉加上皇太
后徽號曰崇慶慈宣康惠敦和裕壽崇禧皇太后頒詔覃恩有差癸丑阿克敦
免以鄂彌達爲刑部尙書仍署吏部尙書阿里袞署兵部尙書降永常爲侍郎
命大學士黃廷桂爲陝甘總督調開泰爲四川總督召劉統勳來京以碩色署
湖廣總督愛必達署雲貴總督己未羅卜藏丹津等解送京師遣官告祭太廟
行獻俘禮庚申上御午門受俘宥羅卜藏丹津罪巴朗孟克特穆爾伏誅甲子
以班第等奏阿睦爾撒納與各頭目往來詭秘擅殺達瓦齊衆宰桑圖據伊犁
溫旨令即行入覲戊辰獲達瓦齊準部平秋七月戊寅杜爾伯特台吉伯什阿
噶什等來降丁亥烏蘭泰以獲達瓦齊封男爵黑龍江將軍綽勒多改荊州將
軍以達巴代之八月丙午賑江蘇海州等七州縣水災卹災丁未上奉皇太后

巡幸木蘭王子上奉皇太后駐蹕避暑山莊甲寅賑山東金鄉等二十二州縣
衡水災封準噶爾台吉伯什阿克什爲親王丁巳上奉皇太后至木蘭行圍庚
申召尹繼善來熱河九月壬申朔免福建臺灣等三縣上年被水額賦甲戌上
御行殿綽羅斯噶勒臧多爾濟等入覲賜宴阿睦爾撒納入覲至烏隴古叛掠
額爾齊斯台站丙子準噶爾頭目額布噶斯等叛起永常爲內大臣仍辦定西
將軍事策楞王保扎拉豐阿爲參贊大臣命哈達哈留烏里雅蘇台會同阿蘭
泰辦事丁丑阿睦爾撒納犯伊犁庚辰頒招撫阿睦爾撒納諭壬午上奉皇太
后回駐避暑山莊癸未賜噶勒臧多爾濟等冠服封噶勒臧多爾濟爲綽羅斯
特汗車凌爲杜爾伯特汗沙克都爾曼濟爲和碩特汗巴雅爾爲輝特汗皆封
喀爾喀郡王桑齊多爾濟爲親王命哈達哈等討阿睦爾撒納丁亥命策楞爲
定西將軍以哈爾哈郡王巴雅爾什第等捕誅包沁叛賊台拉克等皆封巴雅
爾什第爲親王沙克都扎布爲貝勒達爾扎諾爾布扎布爲貝子賑浙江山陰
等十五州縣曹娥等五場湖州一所雲南劍川一州本年被水災民賑湖北江

陵等八州縣衛本年被水災民庚寅逮永常來京降策楞爲參贊大臣以扎拉
豐阿爲定西將軍劉統勳舍巴里坤退駐哈密切責之內申逮劉統勳來京命
方觀承往軍營辦理糧餉以鄂彌達署直隸總督噶勒臧多爾濟之子諾爾布
琳沁討阿巴噶斯敗之獲木齊班咱加封郡王封貝勒齊木庫爾爲郡王以阿
里袞署刑部尙書調汪由敦爲刑部尙書戊戌戶部尙書海望卒冬十月辛丑
朔策楞褫職逮問命副都統莽阿納哈爾阿爲西路領隊大臣甲辰以衛哲治
爲工部尙書鄂寶署廣西巡撫戊申賑浙江會稽等州縣場所水災命富德爲
參贊大臣壬子宥劉統勳策楞發軍營以司員効力癸丑賑山東鄒縣等十九
州縣衛官臺等四場水災丁巳達瓦齊等解至京遣官告祭太廟社稷行獻俘
禮戊午上御門樓受俘釋達瓦齊等賑安徽無爲等三十二州縣被水饑民命
李元亮署工部尙書辛酉起策楞爲參贊大臣署定西將軍命進勦阿睦爾撒
納甲子將軍班第尙書鄂容安敗績於烏蘭庫圖勒死之副將軍薩喇勒被執
丙寅命哈達哈爲定邊左副將軍雅爾哈善爲參贊大臣達勒黨阿爲定邊右

副將軍阿蘭泰爲烏里雅蘇台參贊大臣十一月辛未以杜爾伯特貝勒色布騰爲北路參贊大臣癸酉以策楞爲內大臣兼定西將軍扎拉豐阿爲定邊右副將軍達勒黨阿爲參贊大臣宥青滾雜卜罪甲戌以鄂勒哲依哈薩克錫喇爲參贊大臣尼瑪爲內大臣兼參贊大臣雲南劍川州地震壬午調鄂樂舜爲山東巡撫高晉爲安徽巡撫錫特庫爲巴里坤都統癸未宥達瓦齊罪封親王賜第京師甲午噶勒雜特得木齊丹畢來降十二月癸卯起烏勒登爲領隊大臣以盧焯署陝西巡撫丙午命侍郎劉綸往浙江查辦前巡撫鄂樂舜並查江南浙江賑務戊申免伊犁本年貢賦以吉林將軍傅森爲兵部尙書額勒登代之己未賑索倫達呼爾水災霜災賑湖北潛江等六州縣衛水災賑兩淮徐濱等十二場山西岢嵐州本年水災各有差